

焦太史編輯國朝獻徵錄

焦太史編輯國朝獻徵錄卷之四目錄

駙馬都尉

李貞

梅殷

黃琛

郭鎮

李讓

趙輝

石璟

周景

樊凱

林岳

崔元

山陰張汝樊

全校

吳興茅元儀

錢塘徐象榘

刊行

焦太史編輯國朝獻徵錄卷之四目錄終

焦太史編輯國朝獻徵錄卷之四

駙馬都尉

駙馬都尉右柱國曹國公李貞

貞世居泗州盱眙縣後徙臨淮之東鄉性孝友敦約謙謹尚皇姊長公主元季中原鼎沸貞見里人有廣其田宅厚自封殖者輒嘆曰此何時也乃欲爲富家翁耶遂捐家貲惟牛豕具酒食會鄉里約守望相助居無何亂兵入境時淮東猶爲元守貞挈家避地淮東久之聞上在滁陽乃携其幼子文忠西奔出入亂兵中草食露宿幾不能存活日夜籲天冀保完父

子逾一月始達滁陽見上時甲午冬十有二月也  
上見之大喜衣食供具之甚厚貞父子自慶幸曰吾  
與汝脫離禍亂得至於此可謂再生矣况又得所依  
恩幸之厚其何以報文忠時年十六沉毅有勇智  
上甚愛之曰吾甥猶吾子也教養之備至命從征討  
歲戊戌天兵下嚴衢婺處諸郡命文忠開闢於嚴州  
以經略郡縣之未附者貞自金陵往就養乙巳張士  
誠遣其部將由烏石山犯嚴州及諸暨經兩月不解  
嚴人大怒貞心自不安乃權掌軍務令文忠引兵擊  
敗之六日而還人賴以安丙午上大發兵平兩浙

命文忠以所部兵水陸並進取杭州貞復權掌軍務  
兵出桐廬俘其守關之卒送居嚴州俘卒至嚴見城  
中勁兵悉出陰有叛志貞覺之因饗其衆至醉悉擒  
之送於京師 上甚喜文忠兵所向無弗下者杭州  
平留文忠鎮守貞復來就養又明年爲洪武元年

上卽皇帝位封貞爲恩親侯初貞將避兵淮東而皇  
姊薨權厝里中及是 上念之不已追封爲孝親公  
主勅有司具喪禮還葬於先隴貞時在杭 上思見  
貞形於夢寐時遣中使問起居三年 上欲朝夕見  
貞賜第於內城西偏召貞就第加特進榮祿太夫駙

馬都尉右柱國曹國公追封孝親公主爲曹國長公主貞年近七十旣就第勅免朝常贊拜不名上幸其第錫宴皇太子諸王亦常往存問貞跼踖不自安但以手拊心曰恩義深重言莫能報是時北方旣平餘衆遁走沙漠五年上命將出師殄之授文忠征虜左副將軍以行師出嶺北遇五月捷音未至上頗以爲憂召貞入便殿諭意貞進曰天生聖人承中華之運陛下洪福齊天海內盡歸職方彼元氏區區餘孽假息沙漠不足憂也捷音行且至矣願勿勞聖慮未幾文忠果奏凱而還車駕復幸貞第錫宴懽

甚貞以表謝并辭祿賜表曰臣伏蒙 聖恩以孝親  
公主之親寵賜府第自揆何能叨榮至此臣生長田  
疇弗勤稼穡惟知食力何望顯融初年特蒙 仁祖

皇帝不以臣之庸愚俾居子壻之列久在侍下撫教  
之恩思之無窮報之罔極繼而中原兵起室家無存  
獨携幼子避難他方寄跡於豺狼之區奔走於荆棘  
之地命危朝露豈意生全欽惟 陛下興師仗義應  
天順人握乾符而興帝業奮神武而拯黔黎四海歸  
心羣雄率服臣之父子幸遇 聖明脫塗泥於衽席  
濟垂絕而更生收養掖庭待以肺腑臣之幼子文忠



蒙然童穉承再造之恩扶樹教育俾能成立指授神  
筭鎮守邊陲未効纖毫以禪聖治是猶螢爝之光依  
於日月蚊蚋之響附於雷霆以致武功之成亦預分  
封之例祿食一品位列上公下至愚駮小孫景隆亦  
叨職於侍衛衣冠焜耀於三世恩澤滂沛於一門揆  
今食祿之家未有過於臣者緬思徃時之艱苦豈意  
今日之榮華尺寸絲毫莫非 帝力陛下憐臣之老  
賜以免朝憫臣之愚待以殊禮屢蒙車駕之幸臨時  
沐皇儲之眷顧寵錫每頒於天府爵祿復厚於子孫  
恩意之隆言辭莫罄方今朝廷清明法度具舉官不

虛設祿無俸食臣每存知足之戒恒切盈滿之懼臣  
之俸祿在所當辭伏望 聖聰俯察微忱准臣所請  
庶幾情悃之獲伸稍逭素餐之深愧臣自憐衰晚補  
報無由伏願 陛下壽同天地宗社尊安裕綿福祚  
之長永樂太平之治益貞以國家爲念子雖在側有  
晨昏之奉不以爲喜或奉命征伐四方久勞於外亦  
不以爲憂其篤於忠君至此是年春三月文忠扈從  
秦王晉王之國至六月還僅五日貞得疾忽不能言  
上聞大驚卽幸其第聞疾上執貞手問曰還識朕  
否貞仰笑以對 上洒泣嗚咽不能止有頃 上還

宮中使相繼問遺至是薨年七十有六 上震悼輟  
視朝三日車駕臨奠追封隴西王諡恭獻十有二月  
庚申葬於盱眙縣靈跡鄉斗光山之原從長宮主兆  
發引之日車駕復往望哭於西城樓長公主性至孝  
未下嫁時事父母善承旨意甚鍾愛既嫁助貞治家  
尤極勤儉事姑舅恭順好修善行平居鮮食葷肉夜  
則禮北斗日以爲常前貞二十八年薨臨薨之時神  
識不亂端坐而逝貞繼配陳氏封淑德夫人貞篤於  
孝敬太夫人性嚴貞微忤其意輒加叱責貞嘗侍食  
值太夫人怒投其食噐於地貞徐拾之食如初恭敬

愈至有弟四人父旣沒求分財異居貞語之曰父沒

而母在苟分財異居老母得無不可於意乎先人田廬俱候老母百歲後隨所欲取之吾不較也諸弟皆愧服及貴顯姻族有流寓外方者必請於上而收

之嘗言人之生世貧賤富貴當不改所守一旦富貴而忘貧賤君子不爲也平生衣取適體食惟適口

上不時賜衣幣必緝之雖一帶幣亦必藏以待用或奉養太豐輒不自安召子孫集於前懇懇言未遇時事以曉之曰吾家素涼薄叨沐上恩以至於此雖

日日美食盛饌何患不繼然奢靡之事吾性素不喜

也个 上方以勤儉化天下吾爲戚里之長苟爲奢靡何以勸率家人汝曹念之其儉約蓋本於所性云

駙馬都尉梅公傳

鄭曉

梅公殷歸德人汝南侯思祖從子洪武十一年尚寧國公主爲駙馬都尉恭謹有謀能騎射諸駙馬中高皇尤愛公嘗受密命輔建文君靖難兵起公克總兵官鎮守淮安悉心防禦 文皇假道公割使人耳鼻口授詞答 文皇曰畱汝口與殿下言君父恩義

文皇竟不得道淮安乃渡泗水破盱眙出六合至京師卽帝位公尚擁重兵淮上 上遣公主招公公主嚙指血爲書付李中使至公得書慟哭問建文君所在中使曰去矣公曰君存與存君亡與亡吾姑恐俟

之乃還京見上上曰駙馬勞苦曰勞而無功永樂二年冬都御史陳瑛言公招藏亡命私匿胡人與女秀才劉氏朋邪詛說幾得罪明年冬入朝公讐家都督譚深指揮趙曦令人擠公死宣橋下曦又誣公自投水死都督許成發其事上怒罪深曦二人對曰此上命也奈何殺臣上大怒立命力士持金瓜落二人齒斬之謚公榮定初公主謂上果殺成牽衣大哭問駙馬安在上笑曰爲公主蹤跡賊無自苦公主謹護二子順昌景福上以順昌爲中府都督景福旗手衛指揮僉事賜手書二甥曰朕不念爾母

爾安得至今日二甥後改孝陵衛指揮使宣德中與  
世襲孫純舉進士爲中都副留守或曰公主嘗貽書  
阻靖難兵 文皇不答兵至淮北與公主書言與師  
不得已故今遷居太平門外勿懼兵禍公主亦不答  
公主 高皇后長女后二女次適歐陽倫倫犯茶馬  
禁苑 升學編

武才

國初李曹公掌國子梅都尉攝山東學政皆一時文



驃騎將軍駙馬都尉中都留守司正留守武昌

黃公傳

國史實錄

琛舊名寶武昌人歲壬寅以帳前叅隨舍人擢兵馬副指揮上愛其謹厚命尚皇兄蒙城王女甲辰爲聚寶門店官乙巳授管軍千戶尋改龍江衛守禦千戶累從王師征討及鎮守畿甸多著勞績洪武元年封皇姪女爲慶陽公主誥曰惟天惟祖宗佑我國家開茲洪業王室之親皆同榮顯况在宗女允爲懿戚用稽古典宜有褒封皇姪女長自家庭已歸良圻茲者朕登大寶頒以恩光宜守婦道之常益加恭慎母以

天派自高驕其夫家當脩闕範以來今名可封慶陽  
公主授寶駙馬都尉誥曰郊畿鎮守既爲能臣甥館  
擇賢且爲懿戚此國家之所倚重者也前龍江衛守  
禦千戶黃寶氣鍾偉節才練武韜從軍拓地於金華  
鼓勇收功於江右其勲勞可謂著矣嘗守儀真克冠  
千夫之表旋從右相更闡屢捷之勲及鎮龍江嚴司  
虎旅按茲堅壘靖我遺疆念其尚主於王家是用陞  
官於駙馬寵以銀章之貴頒諸綸綍之新益懋殊功  
副於嘉命可授鎮國上將軍駙馬都尉既而兼明州  
衛指揮使未幾改淮安衛指揮使三年改名琛四年

授誥曰昔者帝王皆以分封天下爲心朕遵古典其於設官雖親必選勲能而任之世其名爵以榮之所以示公道也鎮國上將軍駙馬都尉兼淮安衛指揮使黃琛征伐戍守勤勞有年今天下已定宜共享承平命爾仍居前職令其子孫世襲指揮使爾尚益加慎恭勉其心力明紀律而嚴訓練撫軍士而安庶民永保祿位延及後人可鎮國上將軍駙馬都尉兼淮安衛指揮使後禮部奏稽古公主之制皇姪女宜改封郡主夫正稱所得授官琛當上駙馬都尉誥命上念皇姪女惟此一人不忍遽加降奪命仍稱公主歲

給祿米五百石珠亦稱駙馬止食本官之俸十四年  
擢中都正畱守授驃騎將軍至是卒年四十九歲計  
聞上悼惜之賜葬鳳陽白塔之源于鉉以恩擢左軍  
都督府都督僉事

駙馬都尉郭公壙誌

方孝孺

公諱鎮字彥鼎姓郭氏世爲鳳陽臨淮縣人父英以才勇善戰從太祖高皇帝定天下爲時名將賜號開國輔運推誠宣力武臣元勛柱國封武定侯夫人馬氏公何氏出高祖諱山甫曾祖諱聚以侯貴皆追封武定侯祖妣卓氏曾祖妣趙氏皆封武定侯夫人公故大家伯父子興以軍功封華昌侯追封陝國公諡宣武而姑氏復爲高皇帝妃公以勲戚子第資親繁脩儀正詳謹朝謁之路上屬目址行獨心喜焉洪武二十二年遂選尚永嘉公主賜金王帶鞍馬金繡衣

九襲拜駙馬都尉歲食祿二千石時年甫十七好學  
工詩熟於禮度每命練兵綜事於外恭勤不懈中外  
稱之三十二年閏五月高皇帝崩今天子卽位復命  
賞遼東兵事已而還中途疾作至京師不能朝詔國  
醫視之卒弗愈以元年正月薨於賜第年二十有八  
事聞天子輟正朝三日歛及葬皆遣官祭諸王亦遣  
祭奠子三人曰蘭蕙荃皆上所賜名以是年四月十  
五日葬於應天府聚寶山也葬之具一給於官不以  
煩其家嗚呼公父成功於先而公嗣其富貴以承恩  
寵能恪恭於位今聞有稱可謂賢矣生不永年無以

竟其志豈非惜哉且著始終納諸幽堂庶後之人莫  
敢壞傷

駙馬都尉富陽侯李讓

李讓舒城人父申留江南指揮同知讓燕邸儀賓靖  
難兵起率府兵執謝貴等取大寧戰白溝河有功掌  
北平布政司事佐 昭皇居守防禦有功建文君聞  
之大怒欲誘致讓且宥申讓不肯顧其家力戰破平  
安兵九門建文君遂殺申沒其產并殺諸男并族居  
人沒其幼子婦女異姓姻屬盡謫戍邊讓聞之慟哭  
誓死戰益力永樂元年進駙馬都尉封富陽侯食祿  
千石掌北京刑部事卒贈景國公謚恭敏子茂芳嗣  
侯坐事奪券子與天順元年詔與伯爵卒子欽成化



十五年嗣

駙馬都尉趙輝

駙馬都尉趙輝直隸江都縣人以蔭授府軍前前衛  
千戶直皇城內門 太宗皇帝偶見之奇其貌選尚  
寶慶長公主厯事 六朝眷遇隆厚宣德間降勅有  
練達老成之褒正統間命掌南京左府事尋委奉祭  
孝陵景泰初欲詣 闕報効以殺醜虜以紓痛憤  
朝廷嘉其忠勤成化十四年三月卒輟視朝一日葬  
祭如例輝人物修偉旒知文學好賢禮士然窮奢極  
欲而克享高壽或謂其有得於養生之術云

駙馬都尉石璟

璟直隸昌黎縣人府軍前衛千戶林之子尚順德長  
公主正統十四年督官軍隨駕北征天順五年曹欽  
謀逆璟率衆赴敵擒達賊脫脫 上聞特加獎勞成  
化十四年命往南京奉祀至是卒計聞輟朝一日遣  
官諭祭命有司營葬

駙馬都尉周德章傳

崔銑

景字德章美姿貌廉靖詳雅天順辛巳選尚重慶  
公主叔兄冤又舉鄉試第一人周氏鼎貴聞於河北  
重慶上憲皇同母女兄寵愛亡與比賜金珠玉  
帛山積而景持儒行篤好文史能爲詩日從翰林名  
公請業受益奉賓客器用磁漆脯修取諸市中三子  
侍側獻觴布席竟日不敢休贈遺諸兄隆從子不虛  
歲後掌宗人府事弘治乙卯卒年五十子忠錦衣指  
揮使孝都指揮使賢指揮同知庠千戶

駙馬都尉樊大振傳

崔銑

樊凱字大振安陽大韓村人少給役至縣令見其狀  
貌驚令學凱長身玉立美須髯成化初選尚廣德  
公主凱與周景同鄉主行又同凱慕景爲人襲其行  
事景傾心與友凱亦能爲詩成化丙午命統禁兵日  
介胄升殿侍衛正德初劉瑾用事自公卿以下莫不  
折節而凱獨不屈嘗曰凱幸託主爲朝廷肺腑戚縱  
自輕柰辱主何所統卒王某者瑾鄉人也有心疾凱  
數掠治某知瑾惡凱正值瑾出東華門將升肩輿某  
稱寃狀列凱受禁卒金且多私役者遂罷凱侍衛凱

論事有康濟心今附某一二河間諸郡民貧役苦  
又繁生子越兩人卽闕之是時貴倖者在諸郡子弟  
列上封伯廝養富埒卿相民益冀倖每歲終禮部納  
用數千人不與者猶數千人部中譁自尚書以下反  
避匿凱曰此已無家故志意蘊憤誠得發遣使事藩  
王嚴禁後勿得闕不二年此患息也論團營軍曰軍  
太半私役矣不卽受錢代人役或負擔以生逮操弱  
弓敗矢取具臨時食頃罷一旦有緩急非但不可賴  
亦不能集宜於都城東曠郊指揮以下將兵居各立  
保伍毋得他出給兵符爲信且守且練有事命將往

統之斯強幹而制枝矣子琦璉俱錦衣指揮同知琮  
百戶安陽人又有李讓李堅宣德中皆尚主子孫  
亡居安陽者其世莫得而詳也

駙馬都尉栢岡林公墓志銘

毛澄

正德戊寅九月二十二日駙馬都尉林公卒訃聞  
上震悼輟視朝一日賜米百石布百疋寶鏹萬緡命  
工部治葬遣官祭者十有三諸親王皆祭如制蓋優  
典云公林姓諱岳字邦鎮別號栢岡其先浙江寧海  
人洪武初徙實京師隸水軍左衛曾祖普貴祖某父  
芳應天府學生以公貴授兵馬副指揮贈承事郎母  
汪氏封太孺人公生而秀穎方數歲輒知向學稍長  
通尚書大義習爲舉子文明暢可讀鄉先生以遠器  
凡之年十七選尚憲廟德清大長公主授駙馬都



尉賜詔命及玉帶蟒衣蓋自始被選廷謁八觀 兩  
官賜賚已優厚皆異數也弘治壬戌 天子有事於

南郊命公分守長安右門迨今 上命乘肩輿出

人時節若 帝后忌辰數遣祀 山陵正德丁丑孟

春享 太廟禮益嚴公實承 詔攝行將事祗慎公

立朝浸久國家任使當益重眷顧方隆夫何不能待  
其得年纔三十有八而已惜哉公爲人澗雅不欲以

富貴驕人與士大夫處敬恭不怠暇日閉戶焚香讀  
書不輕出事親孝承事公沒哀毀骨立益卧病久而  
後能起太孺人少有不豫晝夜躬視湯藥及已病篤

值太孺人亦有疾懼其聞而傷也戒勿以告家人不  
得已告之比臨視哀感憤亂絕而復蘇戒其子鹿曰  
吾母若母若等當務孝養勵志讀書勉自成立毋徒  
恃寵祿爲與錦衣相好甚凡宴集游衍必偕視季父  
茂猶父供奉殷勤每先其意念從兄應天府學生山  
遠在南都使逆至京邸相見甚惟畱數月不忍別至  
待諸族黨率從厚云公二子長鹿次鴈

特進光祿大夫柱國太傅兼太子太傅駙馬都尉掌宗人府事京山侯左柱國謚榮恭崔公

神道碑

嚴嵩

嘉靖乙酉夏六月某日京山侯崔公卒於位訃聞皇上嘆悼輟視朝一日錫之贈謚諭祭一十六壇命工部給棺槨營葬事公在弘治間尚永康太長公王孝宗皇帝之女弟也先是戊申十月主薨賜葬於都城南下馬社柞子口之原至是啟壙而合葬焉公諱元字懋仁太原代州人也曾祖諱璟隱德弗仕祖諱震山東泰安州判官考諱儒太學生三世俱以公貴贈

京山侯加贈太傅兼太子太傅妣俱夫人公少從秦  
安公宦邸受毛詩尚書泰安公薨有異徵曰是當大  
吾門乎果被選尚主拜駙馬都尉公美姿儀博覽羣  
籍善詩賦畹諸貴皆自謂莫及公卿大臣折行輩與  
之交賢聲翕然聞於時敏慧有謀朝廷每有大遣命  
必屬之正德己卯江西逆濬圖爲不軌武皇命公偕  
都御史顏頤壽齋勅往諭行至浙聞濬已反乃旋武  
皇晏駕公承昭聖皇太后懿旨齋金符詣興邸奉迎  
今上皇帝入嗣大統上一見知公可屬大事凡有謀  
詣輒咨詢之嘉靖改元以功封奉天羽衛推誠宣力

武臣特進榮祿大夫柱國京山侯食祿一千五百石  
賜誥券奉命護孝惠皇太后梓宮葬茂陵又奉命之  
安陸奉迎獻皇帝神主來京命掌宗人府事上册皇  
天泰號命公充捧冊表受使禮成加太子太傅上南  
幸承天命公偕勳輔五臣扈跸騎從途遇親王朝見  
命行殿侍班上渡河侍舟中賜詩命和車駕還京遂  
命護獻皇后梓宮南耐顯陵事竣慰勞有加自是召  
直內苑時承顧問公明習典制凡有敕對罔不克當  
上意又時時撰進文字悉見采用命乘馬禁中泛舟  
太液命代拜先聖先師於永明後殿命護孝烈皇后

梓宮葬永陵皇太子加冠命充掌冠使上念公等侍  
直勤勞加公太保再加大傅再加特進光祿大夫又  
歲加食米一百石他如白金綺幣玉帶麟蟒之服上  
尊珍饌異恩蕃賚不可勝紀生成化戊戌十二月一  
日暨卒享年七十有二公母第三人允登進士歷官  
山東叅政克魁鄉薦次光皆早卒公撫其孤戚底成  
立代之親族待以舉火者猶多云長子鳳徵娶尚書  
劉公舜卿之女長女適安昌伯錢惟圻封夫人皆主  
出俱早卒次子驥徵側室周出公卒後上特恩擢爲  
錦衣指揮僉事次女適平江伯陳公長子王謨嗚呼

自古尚婚室者亦繁矣若乃借老齊壽具膺福履會  
遊興運簡託心齊茲其猶鮮儷者哉

焦太史編輯國朝獻徵錄卷之四終

焦太史編輯國朝獻徵錄卷之五目錄

公一世封公

續封世

魏國公徐達

徐輝祖

定國公徐增壽

徐景昌

黔國公沐英

沐春

沐晟

沐斌

沐琮

沐崑

成國公朱能

朱勇

朱儀

朱輔

朱希忠



英國公張玉

張輔

鄂國公常遇春

常茂附

曹國公李文忠

李景隆附

衛國公鄧愈

信國公湯和

湯勤附

關中劉必達

全校

吳興茅元儀

錢塘徐象樸

刊行

焦太史編輯國朝獻徵錄卷之五目錄終

焦太史編輯國朝獻徵錄卷之五

公一

特進光祿人夫左柱國太傅中書右丞相征虜  
大將軍魏國公贈中山王謚武寧徐公達神

道碑

御製

大明中山武寧王姓徐氏諱達鳳陽府鳳陽縣人家  
世農業壬年二十有二值元末兵興歲癸巳朕集義  
旅王來麾下朕視其所以周旋幾二年動靜語默悉  
超羣英於是命爲帥首凡有役征以代朕行又幾一  
載明年乙未朕被敵所執敵之帥首亦爲我軍所執

明日王來以身代朕歸縱敵帥首易王還已而從朕  
渡江下采石定太平時機務浩繁姑孰之郡密邇大  
江況元帥首鬻于海牙率舟師以拒江面爲朕肘腋  
之患不暇率兵西征乃命王爲將擇精兵數千東取  
溧水溧陽王兵至守者不戰民庶咸安明年丙辰春  
二月收元舟師於采石王仍屯溧水三月召王從征  
建業越十日庚寅師入建業越七日丁酉命爲大將  
浮江而下水陸並進東取京口大破元師京口已定  
東探浙右時張士誠擅稱名號遣將已據毗陵旌旗  
相望其守者潛遣間諜誘我斥堠王察知遣使歸告

賊勢少窘益兵可不朕遣戰將千餘員甲士十三萬  
師徒會合圍毗陵張士誠自姑蘇發其弟張九六將  
兵數萬來援王遣兵逆戰不移時破之生擒張九六  
城守猶堅朕復益新附二萬帥首審從傾營入城助  
彼來戰初我軍環其城而營之因新附者叛四方去  
其三獨王固守其南開平王猶營東南外一舍之餘  
掘彼援兵尚未驚疑聞新附者叛寇迫王營王拒守  
且戰開平自外來援內外夾攻大敗其衆擒其守將  
張德餘軍敗入其城王復還而困之士誠自姑蘇遣  
將呂珍寅夜入城督兵以守與士相抗初彼軍雖少

糧且足用戰守益堅及誘降入軍多糧少戰且狐疑  
丁酉春守將呂珍潛遁城下師旋復遣征寧國城圍  
援至王發兵扼要而戰援者敗俘斬者衆旬日城降  
宣城亦附凱旋時四方羣雄甚多朕固守江東數郡  
命王秣馬厲兵以觀四方之勢又明年戊戌命王黠  
兵固守建業朕親下浙東金華旣平六月師未幾還  
遣王西征兼程水陸並進徼北秋命王西征池州師  
抵而平陳友諒遣兵來救斬首萬級生擒三千餘時  
張士誠發兵來寇宜興城陷遣王將兵復取師抵城  
下不旬日城復生擒三十餘皆戰死其年惟揚元義

兵盡歸壬寅秋王從朕下潯陽陳友諒敗潰時張士誠發兵攻長興王畱守潯陽未幾召歸師次中塗令復守潯陽比至陳兵已入城守王遣兵與戰陳兵復潰俘斬數千獲其眷屬戰騎彼時潯陽之境空荒棄而弗守師旋建業癸卯春正月取豫章內變王復討平張士誠北寇壽春朕親往援王爲前部張兵敗北旋師金斗周圍其城戰間陳友諒大率兵寇豫章王罷金斗之圍歸整舟師解豫章之難秋七月師次彭蠡陳友諒罷開逆戰王身先諸將敗陳一巨艘死者千五百人自是彼軍勢弱我軍威震由王身先癸卯

歲畱王守京朕西征武昌下克陳之後其年大會兵於京師乙巳歲命王取淮東淮陰諸州仲夏師旋歲丙午命率甲士二十萬東取吳越鏖戰於吳興皂林之野生擒張兵六萬不戮一卒盡赴京師冬十有一月師抵姑蘇明年丁未秋九月姑蘇下兼浙左之太平詔班師命王西略蒼梧九谿率服還軍京師洪武元年戊申春正月朕卽大位二月命王爲征虜大將軍銀青榮祿大夫上柱國錄軍國重事右丞相太子少傅信國公命率甲士二十五萬北定中原抵齊魯而民安所過輯兵守禦規畫足食兵不民擾所得壯

士帥而徂征不煩朕念北齊旣平命渡河南兵至六  
梁父老壺漿以迎西下洛陽長驅清函直抵潼關守  
者拒戰王命宋國公馮勝拔之朕命拒關而守諭歸  
大梁比下河內由鄴下趨趙州抵臨清其年八月三  
日比入胡都捷奏平胡復命西下晉冀如命井陘長  
驅晉冀以平二年春正月召渡河西兵入關中守者  
皆棄全有關內之地召歸天下太平三年冬十有一  
月論功行賞命王爲開國輔運推誠宣力武臣特進  
光祿大夫左柱國太傅中書右丞相相征虜大將軍改  
封魏國公五年夏五月衆議北入沙漠王至嶺北兵



疵而還勅命沿邊輯守歲鎮於燕口外餘民自是收  
盡海內無虞十七年甲子太陰數犯上將朕惡之名  
罷北鎮勞于家是年臘月二十有一日染疾朕恐之  
星馳四召名醫咸至終疾弗瘳明年乙丑二月二十  
七日己未薨特封中山王謚武寧享年五十有四爰  
以是年四月十八日己酉葬于鍾山之陰生男四人  
世子允恭襲封魏國公女四人長女燕王妃王平昔  
言簡慮精當提兵之時命出不二諸將敬若神明所  
至之處攻城不屠與人不戲凡受命而出及功成而  
旋每不自矜至於封姑蘇之府庫置胡公之美人財

寶無所取婦女無所愛忠志無疵昭明乎日月既薨  
朕恐歲月幽遐磨滅偉績朕特親筆生前張我武威  
偃兵息民混一區夏奠安人神之勞以示子孫耿光  
萬世勒諸堅石樹當神道歌曰景命昌今天彰錫我  
英俊兮忠良幽伯秘略兮神機默溫溫兮兼剛柔旄  
鉞而征征兮旣出輜輳綵統兮雄氣軒昂戰騎雷兮  
蹄疾旂旌烈烈兮前行六軍濟濟兮甲冑日于燦爛  
兮精鏃舍之兮周廬星列滿案兮比比懸傷刁十聲  
頻兮令密山川妖冠兮系藏弩弧力勅兮射愧槍幾  
披星月兮秋霜奮忠海內兮孰前當摧撫順兮我武

惟揚

魏國公徐公達

黃金

徐達濠州

今陽縣

永豐鄉人元至正癸巳天下大亂我

太祖集義旅達來麾下年二十二初授鎮撫周旋

上視其動靜語默悉超羣英於是位諸將上

凡有徵征皆以代行乙未以身脫上於危難已而

從渡江下采石定太平命為將東取溧水溧陽禽陳

也先於太平丙申二月破蠻子海牙舟師三月從征

入建康命為大將浮江東下取京口一日克其城授

鎮江翼元帥府統軍大元帥未幾轉江南等處行樞

密院同僉將數萬人攻圍毗陵張士誠遣其弟九六  
盛兵來援迎擊破之禽九六既而阨於牛塘與常遇  
春夾擊敵衆禽其將張德復圍毗陵敵食少戰不力  
丁酉三月遂克之陞僉院繼克寧國宣城亦附八月  
取馬馱沙戊戌十月克宜興十一月上親征婺州  
命守建康己亥四月池州捷聞陞奉國上將軍同知  
密院六月上自浙還遣西征皖城旣旋自無爲登  
陸至浮山砦擊敗趙普勝部將胡總管因克潛山庚  
子五月陳友諒寇池州設伏敗之斬首萬級生禽三  
千餘張士誠兵寇宜興城陷率師復之獲其衆三千

餘皆戰歿辛丑三月拜江南等處行中書省右丞八月從上征江州陳友諒棄城走武昌乃屯兵漢陽之夏口以遏之回守江州尋召歸次中途令復守江州比至陳兵已入達遣兵與戰陳兵潰俘斬數千獲其眷屬戰騎壬寅下豫章命征武昌豫章內變旋師討平之癸卯三月張士誠北寇壽春從上往援爲前部張兵敗北轉攻廬州將下屬友諒大率兵寇豫章遂罷圍歸整舟師從上討之七月師次彭蠡友諒逆戰達身先諸將敗敵一巨艘歿者千五百人命還守建康自是諸將效勇竟殲友諒由達作其氣甲

辰正月陞左相國二月武昌平遂取廬州江陵常德  
夷陵衡州等處乙巳十月取淮東泰州丙午三月克  
高郵四月克淮陰安豐八月總甲士二十萬東取吳  
越廛戰於湖州皂林之野生擒張兵六萬不殘一卒  
盡赴京師十一月師抵姑蘇營于葑門分遣別將軍  
于婁胥間諸門又築長圍困之架木塔與中浮屠等  
築臺三成名曰敵樓下瞰城中設火筒其上一發連  
中又設襄陽礮著物無不糜碎礮風晉人皆先城中  
震恐明年丁未二月遣人自軍中請事 上勞之曰  
古者帝王之興必有命世之士以為輔佐成周伐罪

應揚奮興炎漢仗義羣策畢舉所以克集大勳肇啓  
隆祚者也將軍自昔相從忠義出乎天性然且沈毅  
有謀端重有武故能遏絕亂略消弭羣慝建無前之  
功雖古豪傑之士不能過也今所請事悉欲察命而  
行此賢臣事君之道吾甚嘉之但所請事多可便宜  
行者而識慮周詳不官造次有違誠社稷之慶邦家  
之福然將在外君不御乃古道也自後軍中緩急將  
軍從宜行之時姑蘇城堅難猝破無錫莫天祐與士  
誠爲聲援其部將湯茂善游水天祐遣爲偵邏卒獲  
茂送達達釋而勞之待以腹心於是屢遣茂游水往

平張  
士

北平  
中原

來因獲其彼此所遺書報得士誠天祐虛實知城中  
因乏乃親督兵攻破之九月縛士誠送建康得兵二  
十五萬論功名見於戟門封信國公賜資優厚降褒  
諭十月命爲征虜大將軍帥諸將北取中原 上諭  
諸將曰征伐所以奉天命平禍亂安生民故命將出  
師必在得人今諸將非不健鬪然能持重師有紀律  
戰勝攻取得爲將之體者莫如大將軍達宜專主中  
軍策勵羣帥運籌決勝不可輕動十一月克沂州降  
王宣取益都兗東鄒縣相繼欵附十二月下濟南所  
過輯兵守禦規畫足食兵不民擾洪武元年正月



上卽帝位加銀青榮祿大夫上柱國錄軍國重事中  
書右丞相信國公兼太子少傅誥曰命將出師立興  
土之大業建邦啓土資佐運之能臣伏斧鉞而成顯  
功秉鈞衡而居右揆才爲異等賞亦非常孚在朝廷  
誕宜綸綍某剛姿英傑遠量雄深巖巖山嶽之重矯  
矯虎貔之猛從予起兵于濠上先存捧日之心來茲  
定鼎于江南遂作擎天之柱氣貫萬人而無敵拔幟  
摧城威行四壤而推恩撫民按堵牙旗指顧淮海澄  
清雷電鏗轟湖湘率服西連巴蜀東際溟洋有征則  
總水陸之兵戎所向則收郡邑之圖籍削平二強國

古之名將何以加辛勤十餘年吾之封疆由此定疊  
奏蘇湖之捷俘其臣主而歸允謂元勳宜膺上爵等  
崇相府仍加開國之褒輔導儲宮尤重兼官之選於  
戲太公韜略當弘一統之規鄧愈功名特列諸侯之  
上用頒寵數尚克欽承二月克樂安三月引兵上黃  
河取汴梁守臣李景昌遁父老壺漿以迎四月下洛  
陽長驅崑函直抵潼關守者拒戰命馮勝拔之五月  
車駕幸汴梁詣行在謁見七月渡河取衛輝彰德廣  
平趙州山臨清上德州取長蘆至直沽獲具海舟作  
浮橋以濟師又令副將常遇春都督張興祖各率舟

師並河東西以進令步騎遵陸而前元丞相也速等  
捍禦海口望風奔走克河西務通州元主及其后妃

太子北走八月庚午進取元都至齊化門命將填濠

登城而入達登齊化門樓執其監國宗室淮王帖木

兒不花及太尉中書左丞相慶童平章迭兒必失朴

賽因不花右丞張康伯御史中丞滿川等戮之并獲

宣鎮南威順諸王子六人及玉印二成宗玉璽一封

其府庫及圖籍寶物又封故宮殿門以兵守之宮人

妃主令其宦侍護視號令士卒無得侵暴人民安堵

市肆不移人謂曹彬下江南伯顏入臨安不是過也

既而順德守將吉右丞胡叅政等皆自西山來降復  
獲前樂安逃將俞勝及南叅政等乃遣使赴京獻捷  
上大嘉賞是月承 詔置燕山等六衛以守禦北平  
九月命將略保定中山河間真定 俱下十一月  
達發北平取山西所過擇人守要害又平未附山寨  
十二月將圍太原謂諸將曰聞擴廓帖木兒以元主  
命率師遠出太原取道保安經居庸關以攻北平孫  
都督總六衛之師足以鎮禦我與爾等乘其不備直  
抵太原傾其巢穴則彼進不得戰退無所依此兵法  
所謂批亢擣虛者也若彼還軍救太原則已爲我牽

制進退失利必成禽矣諸將皆曰善遂引兵徑進擴廓帖木兒至保安聞之果還兵其鋒甚銳遣精銳夜襲其營擴廓聞變倉卒不知所出急踰帳後乘驛馬逝去遂克太原得兵四萬人馬四萬餘匹復遣薛顯傅友德擊賀宗哲等軍於石州而崞忻霍絳猗氏平陽等處皆平二年取鹿臺河中關中進克鳳翔會諸將議師所向諸將咸以張思道之才不如李思齊慶陽易於臨洮欲先幽州取慶陽然後從隴西攻臨洮達曰不然慶陽城險而兵悍未易猝拔臨洮之地西通番夷北界河隍得之其人足以備戰鬪其土產

足以供軍儲今以大軍蹙之思齊不西走胡東手就降矣臨洮旣克則旁郡自下諸將然之遂進克隴州秦州至鞏昌降其平章梁子中總帥汪靈真保乃遣右副將軍馮宗異征臨洮李思齊果不戰出降獻銀印等物張良臣聞而懼亦以慶陽降達征平涼良臣復叛達怒趨至涇州諸將咸以師會達命顧時陳德傅友德俞迪源率精騎抄其出入之路以絕其聲援復令馮宗異湯和等以兵四面圍其城良臣開門恣人馬馳騁城下達麾兵擊敗之久之良臣志不得逞戰復不利遣人赴寧夏求援皆被獲內外音問不通

糧餉乏絕平章姚暉等知事不濟獻門納師達勒兵入北門良臣投井中引出斬之陝西悉平十二月上大賞定中原諸將以達克敵制勝振揚國威撫綏軍民得大將體賜白金五百兩文幣五十表裏三年復總兵征沙漠大破王保保軍于定西遣將取興元復西平上蕃征哨極于西北始還是冬大封功臣授開國輔運推誠宣力武臣特進光祿大夫左柱國太傅中書右丞相進封魏國公叅軍國事食祿五千石賜誥命鐵券其文曰朕聞自古帝王創業垂統皆賴英傑之臣削羣雄平暴亂然非首將智勇何能統率

而成大功如漢唐初興諸大名將是也當時雖得中原四夷未盡賓服以其宣謀效力之將比之豈有過我朝大將軍之功者乎爾達起兵以來爲朕首將十有六年廓清江漢淮楚電掃兩浙席捲中原威聲所振直連塞外其間降王繒將不可勝數項者詔令班師星馳來赴朕念爾勒勞旣久立功最大今天下已定論功行賞朕無以報爾是用加爾爵祿使爾子孫世世承襲朕本疎愚皆遵前代哲王之典禮茲與爾誓若謀逆不宥其餘若犯死罪爾免二死子免一死以報爾功於戲高而不危所以常守貴也滿而不溢



所以常守富也爾當慎守斯言論及子孫世世爲國  
良臣豈不偉歟仍賜文綺及帛一百疋四年賜地若  
千頃佃戶若干戶守墳人百五十戶儀仗戶二十家  
復賜第京師表其里曰大功坊五年北征還命沿邊  
輯守歲鎮於燕口外餘民自是收盡生養休息海內  
無災十七年召還至冬疾作上遣使馳召名醫視  
之及禱于神祇弗瘳明年二月二十七日薨年五十  
四上慟悼罷朝親爲文祭之追封中山王謚武寧  
賜葬鍾山之陰上謂羣臣曰朕起自徒步大將軍  
爲朕股肱心膂戮力行陣東征西討削平羣醜克濟

大勲今邊胡未殄朕方倚任爲萬里長城之寄而太  
陰屢犯上將不意遽殞其命天何奪吾將之速朕夜  
來竟夕不寐歎歔流涕思盡心國家爲社稷之重安  
得復有斯人乃欲有以報之無所用其情耳但著其  
勲烈宣于金石永垂不朽使後世知斯人爲國之元  
勲也遂親製神道碑旣備其功又稱其平昔言簡慮  
精當提兵之時令出不二諸將敬若神明所至攻城  
不屠與人不戲凡受命而出及功成而旋每不自矜  
至於封姑蘇之府庫置胡宮之美人財寶無所取婦  
女無所愛忠志無庇昭明乎日月復命配享太廟

聖像祭于功臣廟位皆第一其上三世皆封王爵王  
夫人子男四人皆 上所賜名輝祖襲魏國公添福  
勳衛增壽左都督膺緒僉中軍都督事女四人長

仁孝皇后次代王妃次安王妃孫茂先周府儀賓景

昌定國公欽襲魏國公

開國功臣銘

封公後復佩大將軍印填北平以便宜徙山後順寧  
等處軍民戶三萬五千八百口一十九萬七千餘籍  
爲軍者給月廩爲民者給田以耕凡置屯二百五十  
四定墾田一千三百四十三頃北平軍府之用皆賴  
之

上嘗從容謂徐允功大未有寧止欲以吾吳時舊邸居若達固謝不敢一日強沃以酒既醉覆以被舁卧邸正寢達醒大驚俯伏階下呼死罪不已上益悅命有司爲治甲第表其坊大功口令世世無忘爾功胡惟庸爲左丞相檢而貪以達元勲貴重欲內好達惡之反賂達閹者福壽使爲間以圖達福壽發之達亦不問惟時時爲上言惟庸不可過委過委必敗後惟庸反帝以是益重達

李氏積善書

### 魏國公徐輝祖傳

王世貞

公徐氏諱輝祖初名允恭鳳陽人父曰中山武寧王

達首佐

高皇帝定天下出入將相助德爲諸功臣

冠配饗

廟廷始娶張夫人以不宜室卒 上爲特

繼謝夫人首舉公公生而白皙秀眉豐下及長長八

尺五寸顧盼有神舉止儼雅中山王數填北平留公

宿衛御家家衆肅然 上故心器之命理左軍都督

府月廩祿二十石未幾而中山王自北平還疽發於

背有間 上命公奉 手詔道迎勞俄而王薨又三

年而爲洪武己巳始命公襲爵魏國公賜誥稱揚中

山王之烈而勉公忠以立志禮以守身恪盡繼承之

道尋以皇太孫允炆嫌名改今諱明年賜公與諸公

各黃金三百兩白金二千兩鈔三千錠文綺三十疋  
綾十疋俾還鳳陽賜第以歲時入覲等給兵百二十  
人爲衛復賜鈔四百錠明年出陝西防邊自是歲出  
練山東河南卒 詔公仍于太倉支歲所受祿五千  
石而還公田於官時故元降將阿魯帖木兒乃兒不  
花與其部衆隸 燕王軍中有異志爲告者所發

上密詔王調實而命公以詔往公之姊王妃也於是  
悉得其實與王合筭併其黨與悉捕送 闕下戔之  
二十九年國子學正吳啓言國子師生日夥不爲甄  
別高下無以懲勸 上命公帥禮部翰林院臣詣監

試其文統分別送吏部銓用公勛臣也 上知公有  
文故特寄之人以爲榮 高皇帝崩 皇太孫卽位  
時諸宿將且盡公與李曹公俱以肺腑領朝班曹公  
加太子太師公加太子太傅 文皇帝爲燕王時入  
臨稱疾不拜王屬尊而功高有武略擁強兵 朝議  
憚之會王歸而畱次子高陽王待命於邸欲藉公爲  
耳目公謝絕之高陽王微聞諸大臣謀有所不利於  
燕王卽夜竊公善馬歸燕公大驚晨白之于 上亾  
何燕師起以誅君側爲名諸侯徹兵往攻之相繼敗  
始議置大將公與曹公皆當往時曹公有公卿間聲

者  
分  
中  
者

而公終以燕戚屬故見左然公一意扞圉時曹公與  
歷城侯相繼敗燕師日迫矣其世子高陽王皆陰餌  
公爲內應公確然不撓乃改餌公叔弟及師攻金川  
門公猶與常開公昇等分道出大戰皆不利京師悉  
爲燕公獨守先王祠不從勸進于是錮之私第尋逮  
下獄久之公竟不屈以死時僅四十涂土姊爲仁  
孝皇后竟晏駕不敢爲公請久之上追思后不已  
且念中山王功大召公子欽予故公封還其舊所削  
祿及廬產益百八十年而今上皇帝詔悉錄爲建  
文君死事者各以官稱廟祀之金陵而公居首



外史氏曰當文皇之起兵而徐公其妃弟也毋論成敗之猶匿而公矢節故主卽革命之際小一移志爲曹公所爲業以元舅居上公備心肺疇能易之公舍而恬然趣歿一何決也於建文爲純臣於中山王爲令子矣文皇以死全公之志而弗奪其爵以報中山王今天子又能光大顯融之先聖後聖其一揆哉雖然亦可以觀天道焉

定國公徐增壽

增壽中山武寧王第三子母謝氏生而眉宇秀朗少嘗侍父入見太祖高皇帝奇其機警賜名增壽長

而勇敢善騎射選爲勳衛帶刀侍從謹實寡過陞右  
軍都督府左都督嘗奉命從上征胡寇乃兒不花  
與有勞績雖生長貴盛而所居一室左右圖書公退  
延賢士其中講論古今成敗得失之迹疊疊忘倦  
上之舉義增壽最效勤誠有發其事於胡遂囚之  
上入金川門建文君將自焚命梓至殺之右順門廡  
下上追悼之首褒贈爲武陽侯賜諡忠愍勅有司  
治喪具棺葬其父中山武寧王墓次卹贈欽承父業  
推誠守正武臣特進榮祿大夫右柱國加封定國公  
命其子景昌襲爵

定國公徐景昌

楊士奇

中山王四子長輝祖襲爵魏國公次增壽當 太宗  
皇帝靖難之際有翼戴功而竟歿非命初追封武陽  
侯進定國公謚忠愍公其嫡嗣也時年十五召見賜  
名景昌遂命襲爵定國公授欽承祖業推誠奉義武  
臣特進榮祿大夫右柱國食祿二千五百石子孫世  
襲命吏部慎簡名儒道之學問公天資英敏已疑疑  
真智識從師講授日謹其師豐城丁秀恒重厚雅則  
公惟其教之率未嘗或違而寒暑朝夕所以事師禮  
威備踰年始趣朝參 上察其進退恭謹喜遂欲任

以事永樂四年命掌左軍都督府雖細務必親而習  
日廣明汴河溢命公代祀河忠以寧十三年車駕幸  
北京以公事入見顧問再三進對稱旨賜御廐馬三  
疋鈔六萬緡十七年修鳳陽皇陵宮殿命公董之益  
竭祗勤撫綏獎勵人競勸功十八年侍 仁宗皇帝  
入朝洪熙元年命掌行在後軍都督府是年丁母太  
夫人沐氏憂宣德初起復高煦構逆 宣宗皇帝下  
詔親征命公等守北京師還 賚良厚後車駕三出  
巡邊公皆扈從祀嶽瀆及冊封宗室皆秉虔將命先  
是 仁宗皇帝篤念外家孜孜勉公兄弟子姪於學

公祗體德意克力進修朝退閉門手不釋卷遂多識  
古人言行之善與凡治亂興衰之由問暇吟咏自適  
家居事親孝爲人簡靜寡所交處惟名儒賢士過之  
必起趨逐相與傾寫極歡未嘗苟附權貴享年五十  
計聞 上命賜祭賜賻勅有司治葬葬宛平縣京西  
鄉黃家臺之原配張氏封定國夫人子男二長顯忠  
次顯義

黔國公沐英傳

沐英字文英定遠人父諱超母顧氏英八歲而孤屬  
元末大亂母携之逃難又故時 太祖高皇帝龍飛  
濠梁英往依之惻然撫之爲子則以國姓年十八爲  
帳前都尉甲辰遷廣武衛指揮使尋加昭勇大將軍  
改廣信衛勤於軍政高城利兵以俟攻取士卒有蹂  
踐民田禾者必加重譴百姓安之洪武元年二月從  
大軍下崇安剪陳友定拔溪寨破漳泉等州遂定閩  
中三月命復姓仍調守建寧節制邵武延平汀州三  
衛三年授鎮國將軍僉大都督府事四年陞本府同

知進階榮祿大夫署學府事時開創之初四方文移甚劇英剖決如流九年巡勞關陝以西疾苦事多所便宜十年副衛國公鄧愈征西戎直抵崑崙山值霖雨浹旬餽運弗繼英與士卒同甘苦病者醫治之士皆感悅効疾大戰關地數千里遂進封西平侯賜號開國輔運推誠宣力武臣階仍榮祿大夫勲柱國食祿二千五百石授以鐵券俾子孫世襲十一年拜征西將軍將京師及河南陝西山西兵復征西蕃降其衆二萬俘馬牛羊二十餘萬得納降七站之地擒其酋長曰三副使曰瘦藤子者獻于京威震西土十三

年春元孽脫火赤國公愛足知院爲邊患英將陝西  
兵略亦集乃西路渡黃河經寧夏歷賀蘭山涉流沙  
至其境分軍爲四一襲其背二掩其左右英自率帳  
前驍勇當其前夜銜枚以進合兵攻之俘其全部以  
歸十四年大將軍魏國公徐達北征英副之將一軍  
由高高全寧過鹽朔河獲知院李宣守上以元遺孽  
梁王栢匝剌瓦爾密恃雲南險遠戕虐使臣以英副  
潁國公傅友德率師三十萬征之遂繇辰沅遵陸路  
出羅鬼攻晉定晉安循格孤山之南出奇兵襲畢節  
擊可渡河皆下之梁王遣其司徒達里麻駐兵曲靖



拒守英謀於友德曰雲南兵屯曲靖必意我軍深入  
疲勞且以程計之謂未能猝到彼必懈惰我若兼程  
以進出其不意掩其不備此批亢擣虛之術也曲靖  
一破餘可傳檄而定友德然之遂乘大霧進至白石  
江阻水而止霧斂則已薄其營矣江闊僅一里許其  
淺處可涉也衆咸欲與戰英視其陣曰我軍遠來形  
勢旣露固利於速戰然亟濟則所傷必多宜多方以  
詗之乃整衆鳴鼓若將濟者彼悉擁精銳拒於水上  
英別遣一軍泝流暗渡循山而出其陣後吹銅角以  
張聲勢仍于山林岩谷間樹旗幟爲疑達里麻驚懼

急撤陣後軍以禦之水上軍覺之心動而陣亂英於是拔刀蹙兵以濟士有猛而善泗者數百人皆蒙盾而渡以長刀仰斫岸上軍却我軍得登者人百其勇彼軍退數里結陣而待我軍甲濟既就列旌旗烜燿鎧仗鮮明彼軍奪氣友德麾兵進戰火炮交發鼓譟之聲震動天地接戰數合僧未分勝負英察其氣已衰縱鐵騎直擣其中堅連斬數百人出入其陣彼衆披靡遂敗之生擒達里麻俘甲士二萬馬萬匹死者不可勝計橫尸十餘里梁王間敗走允滇池島中英乃駐兵金馬山父老焚香迎拜入城禁士卒毋撻掠

收梁王金寶并官府符籍雲南平果如所計遂分兵  
卜烏撒得七星關以通于畢節十五年春正月分遣  
將士略建昌潯江臨安沅江尋甸楚雄洱海等處獨  
大理酉段世據南詔皮羅閣故城不服英命常茂從  
間道繞點蒼山後攀崖緣木而上據其巔樹旂幟以  
亂之英乃斬關而入遂拔其城擒世調勝兵取鶴慶  
掠麗江下金齒收三營砦破石門關軍威大振由是  
摩娑和泥車里平緬相率來附雲南大定泰分烏撒  
烏蒙東川芒部建昌會川羅鬼普定晉安水西畢節  
隸四川自是雲南列爲郡邑凡府州縣宣慰司長官

司一百八籍其戶七萬四千六百餘分設軍衛犬牙  
相制以守其地夏四月回軍與友德會于滇池之上  
時烏撒東川建昌皆有變志友德曰蠻夷叵測若不  
乘我兵力以定之終于叛亂英深然之遂相與合兵  
皆攻下之并克芒部斬首三萬級所獲牛馬羊數萬  
餘立烏撒畢節二衛以鎮之師回秋九月雲南諸部  
復率衆攻城都督馮誠固守設樓櫓強弓于埤賊近  
輒射之稍怠則出勁兵以擊之英聞變兼程還曲靖  
遣健步懷羽檄走報城中約爲內應爲賊所得健步  
曰總兵官領大軍至矣賊散走安寧羅次邵甸富民

晉寧大棋江州等處據險自保英分兵勦除之斬首  
六萬級生禽四千人雲南復平畱英鎮守十七年廣  
南特磨遁作耗英親入其地按兵不進諭以天道禍  
福遂降之二十年春浪穹遁寇扇羣蠻爲亂鶴慶劍  
川相應英調大理衛指揮鄭祥乘其未集掩而殲之  
二十一年春正月百夷屯摩沙勒犯邊調都指揮賓  
正領兵擊破之斬首千五百級三月復悉衆號三十  
萬戰象百餘寇定邊以報摩沙勒之役親率兵二萬  
抵賊營與之對壘出輕騎三百挑之賊以萬人象二  
十迎戰鋒始交獲一象殺賊百餘人而還於是軍氣

益壯咸曰賊易殺也英乃名諸將校謂之曰定邊受  
圍已久若不卽破賊設定邊失守則賊勢益張彼徒  
恃其衆以恐懼我軍今方少以騎士挑之已獲一衆  
又何足畏乎吾知所以破之之術矣可多置火銃神  
箭於前作三行參差而陣向彼衆近則前行之銃箭  
齊發衆若未退則第二行者繼之第三行又繼之使  
銃聲不絕衆必驚而却走然後以大軍乘之破之必  
矣明旦分軍爲三隊都督馮誠領之甯正領其左都  
指揮周知湯昭領其右乃下令曰主上平日恩養將  
士正欲效膚寸之力於戰陣之間爾今日之事有功

者賞退餉者戮全隊三令而五申之將士鼓勇爭進則悉衆出營盜驅戰衆結陳以待英駐馬於高岡以觀左隊小却英望之怒遽遣使馳取左隊將之頭左隊遙見使者橫刀飛馬而來復拂士卒人呼突入其陣無不一當百大戰破之斬首三萬餘級俘萬人衆中矢死者過半生獲四十有七殺其酋餘黨盡殪百夷酋長思倫發聞之遣人奉方物犀象來降願輸貢賦英爲之請於朝許之遂定其地秋八月東川蠻據烏路山結砦而叛其他重關疊嶂縣崖峭壁上下三百餘里人跡阻絕調甯正帥雲南真會京軍角

討而降之冬十月廣西阿赤部首長者滿矣情結越  
州土酋阿資叛英自將直橋阿赤部者滿矣情皆服  
誅俘男女五千餘口牛馬如之阿資降二十二年春  
二月阿資復叛再調竄正討之殺火頭弄宗等五十  
九人冬十月入覲 上宴勞賜黃金二百兩銀五千  
兩鈔二萬五千貫文采百純別賜沙五萬貫使建第  
于鄉居十日而還英初如京西南之民無老幼惟恐  
其不來也戚戚然東向望者累月及聞還各川率遠  
迓數百里之外二十三年秋九月臨安被化三部不  
供租賦調本衛指揮王執討平之冬十月普安酋密



卽作亂調貴州都指揮張泰討之俘獲二千餘衆獲馬牛數千得糧四萬斛二十四年春正月順寧蒲蠻猛吾馬忒爭襲傷及官軍調都指揮俞輔往問其罪夏四月阿資又叛英集諸將佐議曰雲南地方數千里伏天朝威武金齒百夷車里平緬摩步和泥及諸種羅羅蠻獠悉以降伏惟阿資恃險累叛若不復其巢穴雖曰彈丸黑志終爲便化於是簡士卒親入至補衝賊衆迎敵英麾兵擊之殺獲殆盡阿資僅以身免遣其子請降秋七月英以八百媳婦弗率命遣使招之其酋長刀木板懼遣招剛闕都奉方物于

朝而歸附焉二十五年五月十七日得未疾卒年四十七訃聞上哭之慟輟朝遣官致祭其詞有曰使我無西南之憂者英之功也命長子春迎喪官軍護至京師上遣中使祭臨追封黔寧王謚昭靖配享廟庭 賜葬江寧縣觀音山之原英為人寡言笑沈毅有智量好賢禮士撫御卒伍尤有恩意所至未嘗濫殺既鎮雲南乃築城垣設衛禦簡官僚修惠政剔奸蠹撫酋豪興學校佈館傳嚴伺祭治水利立屯田謹斥墾墾田一有一萬二千畝辨方物以定其貢稅視民數以均其力役疎節日以寧便其人嘗從容詢

一儒生曰吾亦欲觀書何者爲要對曰儒者之學必自小學四書始以至五經諸史莫不欲遍通今公爲國重臣春秋鼎盛但當究輔弼之大義以安天下爲已任豈欲效書生博學強記之習哉惟大學衍義一書乃宋儒西山真先生所撰其格致誠正脩齊治平之道與夫天人相感治亂之所由皆具此書公必欲觀書請觀此書則大人之事備矣遂欣然令左右售而得之退朝之暇卽延縉紳講解切嗟間之以通鑑綱目不三二年學問大進論事輟援引典故其在雲南于鈴閣之素壁間命善書者大書周子太極圖說

張子東西二銘朱子敬齋箴孔明出師二表李密陳情表韓愈佛骨表朝夕瞻對求其理趣又擇民間之俊秀及土官之子弟皆令入學肄業使知禮義曰首善之地風化攸出不可後也間於朔望釋菜畢延師生坐於堂設廣席坐諸生於庭烹羔羊以食之土官子弟於冬夏製時衣以衣之嘗得大極圖善本并白鹿洞規善之刻石置文廟平居無所嗜惟有馬癖嘗語人曰天用莫如龍地用莫如馬支遁一僧爾僧愛其神駿而畜之吾將也馳逐於兩陣之間順吾驅策與吾一心以立功者在良驥耳是不可愛而他愛乎

審息甚富其良者以充歲貢餘遇有征討分給將校將之勇敢善戰者所得多至十餘匹然未嘗售於人以規利後雲南父老與蠻夷土官願卽府城立廟合辭以聞 上報可及追王三代妻馮繼耿俱追封黔寧王夫人子男五春晟昂杲昕

西平惠襄公沐春行狀

唐愚士

公諱春字景泰世爲鳳陽定遠人考黔寧昭靖王幼失怙恃當元末大亂甫八歲會 太祖高皇帝龍飛濠梁見而憐之命 孝慈皇后育以爲子迨長總兵四征咸著勳烈命復故妊頒賜鐵券號開國輔運推

誠宣力武臣階榮祿大夫勳柱國官大都督府同知  
爵西平侯食祿二千五百石子孫世襲及薨乃追封  
而賜諡焉公則王之冢嗣也生未替迨母夫人喪物  
于外祖氏長歸就學洪武己未始十有七歲卽侍王  
考征西蕃洮州掄元三副使明年從征亦集乃掄國  
公脫大赤等歸又明年從征雲南歷功先士卒十六  
年還京師遂掌禁旅冬江西寇借號順天王煽諸郡  
作亂公與征馬灣首矢石奮勇先登破之明年師還  
初天兵旣平雲南留王鎮守機務之密者非他人所  
能道凡有遺輒命公一歲之內馳驛再三所報悉稱

自十八年秋授驃騎將軍僉後軍都督府事廷臣請  
試職 上曰是兒我家人非他比也畀實授後軍轄  
幅員之北視他府爲劇公割決如流事無壅滯是年  
冬繫天下重罪於烈山公錄而詢之奏釋數百人十  
九年蔚州民告變那海等構逆 上命公馳驛往至  
則巡城厲士衆而捕之推校得實白其誣枉 上悉  
恩宥又全活數百人二十年春從征虜大將軍宋國  
公帥師三十萬北出沙漠剿元之餘孽未庭者次金  
山降其署丞相開元王納哈出俾朝京師公爲護送  
納哈出與其屬見其威嚴甚敬憚之二十五年六月

王薨於雲南公往奔喪十月奉柩還葬哀毀盡禮尋  
有詔起公襲爵繼任誥曰英命爾父副征雲南留鎮  
其地能布恩德蠻夷率服朕無西南之憂者十有一  
年今命爾襲父之爵當思爾父相逢之幸忠誠爲國  
夢寐存心則鬼神有鑒福祿永昌矣及命雲南各衛  
軍馬悉聽節制一切事務應奏者必經由然後來聞  
陛辭奏曰臣父鎮滇畜馬駒以勞戰士燕寵錫以賚  
遠夷請以其羸歸數有司 上弗之許仍厚其賜以  
遣至鎮則宜 上德意發踰令修戎撫民柔遠懷邇  
無改于父之道又謂食爲兵天屯政實第一事較多



寡之入嚴賞罰之例積功乃倍餉饋以足二十六年  
春緬國酋南速刺來朝貢于京和泥祿谷爲邊患遣  
元江刀平控禦之羅雄法束嘯聚命都督何福討降  
之東川酋弗靖公復攝養爲知府境遂寧謐秋維摩  
阿的等一十砦酋王弄山撒哈諸酋拒命調都督  
能平其地俘一千一十九斬六百五十四級獲馬五  
十二牛羊四千有奇皆給戰士遂讐服不敢携二十  
七年春越雋賈哈刺連西蕃蠻邊出沒北勝浪渠州  
公潛遣百戶簡宗賢輕騎而往集民兵伏其要覆之  
擒斬二百四十三請立瀾滄衛以填其地緬復獻方

物秋施甸蒲阿董等衆犯永昌境公命指揮使胡淵  
乘間出奇襲殺賊三百三十二獲馬七十二衆遂披  
靡先是越州蠻龍海子阿資據龍窩縱殺掠累爲民  
害 朝廷命諸將率兵數萬征之師無功自後無敢  
議伐者得肆猖獗公復討之衆以爲難進兵紫溪山  
擒其黨者宗乃謀曰歷年不獲此寇者彼恃其地多  
險阻及各處土酋皆姻婭得亾匿今調土酋悉從征  
設謀羈絆俾不能通復多置營堡相犄角制其出入  
授首必矣乃分駐陳寧逼之二十八年正月六日兵  
至赤窩果獲阿資屍諸市及誅同惡沙陀普也等二

百四十一人越州平阿資素爲桀黠至是捷聞上  
嘉獎之衆亦嘆服冬廣南酋僕眞佑阻兵負固公調  
都指揮王俊征之盡殪其衆凡俘斬二千一百七十  
馬牛四百八十八穀二萬一千六百四十石廣南通  
明年順寧酋猛丘結外夷雲龍酋段羌納逋逃皆蓄  
異志公遣大理衛指揮使鄭祥往討猛丘懼而斃羌  
伏誅改立猛朋段海食其地寧遠州右爲七十城門  
壤交趾恃險遠肆強獷公命何福率兵一戰蠻臺江  
擒殺男婦二千四百五十盡獲其乘象軍實酋刀拜  
欄始懼乞降奏復其官麓川宣慰思倫發先酌于酒

其下多怨三十年春刀于孟弄兵謀逐其主以自立  
思倫發窮奔告援公與之入朝面受 宸筭以歸三  
十二年二月永寧卜八如加復通賈哈刺寇逆調何  
福擒之戮其脇從二十三俘獲男婦三百餘餘黨悉  
潰三月公以思倫發之告駐師怒江諭刀于孟稱兵  
不聽四月乃戒何福瞿能率勁卒八千喇枚倍道直  
擣刀名孟砦渠魁乘象突出追射殺之遂奮兵縱擊  
大破其衆四萬餘斬三千六百餘級獲象四十馬一  
百五十回擊景罕空蓬二砦皆下之時黨衆七萬裨  
將請屠以逞公曰殺降不武乃止誅其尤餘盡釋之

捷聞大廷以征虜前將軍印授公命總四川貴州雲南各道兵欲盡平其地時公得疾已三四寒暑嘗竭誠殫思氣血愈耗及聞太祖昇遐哀痛甚疾革然未嘗告憊有問者則曰邇稍間也將以秋復征而遂不起矣九月十二日甲申夜半長星自東墜西其聲如雷衆咸見聞公隨薨享年三十有六訃聞 賜祭葬諡惠襄公在鎮七載增闢田以畝計三十萬五千九百八十四益糧餉以石計四十三萬五千八百有奇復民戶五千七百五十萬二千四百二十四又嘗鑿鐵池河三十六里灌宜良涸田數萬畝民受其利

初王之薨父老爲立廟請諸朝報可將鳩工適公  
至曰元咸陽王功德崇懋廟廢不治當先之乃新其  
祠宇議者謂公不私其親友人皆異端有得胡神肖  
像於舊井者訛言沸騰有神異傾城駭觀至萬人公  
立命焚之通衢識者知公不惑於怪譎唐有武臣口  
李晟提孤軍抗羣賊身佩安危而氣不少衰爵封西  
平圖像凌煙其子涼公愬亦克以偏師破蔡復唐土  
宇君子以其父善教其子善繼稱之方之今黔寧王  
父子之功德勞烈未知其孰優而孰劣必有能辨之  
者

黔國公贈定遠王謚忠敬沐晟仲道碑

楊士奇

正統四年三月十八日黔國沐公薨於雲南之楚雄  
訃聞 上悼念輟視朝加隆卹典追封定遠王謚忠  
敬其子護喪歸南京葬江寧縣長寧北鄉觀音山先  
塋之次沐氏鳳陽定遠人王之高祖考曾祖考祖考  
以昭靖貴皆追封黔寧王高祖妣曾祖妣祖妣妣取  
皆追封黔寧王夫人昭靖四子伯諱春襲封西平侯  
歿謚惠襄仲卽王叔昂右軍都督府同知季昕駙馬  
都尉王諱晟字景茂自少氣宇闊厚端慤凝重聰悟

過人而博學遠識恭慎寡言喜愠不形於色 高皇  
帝重之既授後軍都督府僉事以夜抵勤陞授特進  
榮祿大夫左都督惠襄繼貽靖鎮雲南堯王嗣封西  
平侯仍奉命鎮雲南王承父兄之後秉誠殫慮益弘  
遠圖威服德懷恪勵以夜先是麓川不靖諸蠻遂宣  
慰使而分據其地王遠至奏發兵平之復奏以其地  
置孟養木邦孟定三府鎮沅威遠二州于川潞江灣  
甸大侯者樂五長官司而歲徵其貢賦又於潞江之  
西置騰衝千戶所以控制之火遂帖息 太宗皇帝  
臨御之三年八百蠻酋侵邊王遣將先率兵討之躬



率兵繼之後及蒙自縣蠻聞王來遂遁進擒其首誅  
之事聞賜璽書白金勞王四年安南叛命征夷將軍  
率兵及湖廣等都司兵討罪命王佩征夷副將軍印  
充左副將軍率雲南等都司兵分道進討王率兵由  
蒙自經野蒲斬木通道以入先遣偏裨攻集猛烈棚  
華關隘賊徒悉遁遂築堡駐兵造船分遣諸將出宣  
光江口奪澳沔寺沙昇舟夜出洮水陣師遂遣將引  
兵泝流攻賊之富良江自旦鏖戰抵暮賊引却翼旦  
諸將咸欲奮擊王曰受命弔伐所欲得兇渠數人而  
已縱殺非 皇上好生之心乃止遂造浮梁渡師時

征夷將軍大兵至乃合攻寇之多邦城柵繼擣其東西二都及盤灘困枚檣江仙侶等寇悉破之寇首黎季犁父子狼狽棄其衆獨挈家屬及左右心腹遠遁於海王合征夷將軍兵追至日南州奇羅海口禽俘無遺械送京師凡得郡四十八縣百八十六戶三百十二萬五千九百獲象馬牛畜軍資器仗無筭安南平六年春班師入朝賜號顯忠輔運推誠宣力武臣特進榮祿大夫右柱國封黔國公食祿二千石賜誥券玉帶金幣命子孫世襲既大宴上親製詩褒嘉又日賜宴于便殿還鎮雲南是冬安南餘寇携二命

王佩征夷將軍印總兵討之王師歷境寇遁入又安  
海島追至占城之境會寇首陳季擴阮師郢容等送  
京師誅之師還仍鎮雲南十七年富州蠻酋積逋賦  
不入 朝廷命王發雲南貴州兵討之蠻據險以抗  
王遣兵斷其後諸將請急攻王曰威服不若德服遂  
使人諭以禍福蠻卽遣子詣京師謝罪悉償所逋  
仁宗皇帝嗣位重王勲德老成詔兼太傅名至恩禮  
加厚遂命佩征南將軍印還鎮 宣宗皇帝初嗣位  
遣使齎璽書金幣勞之 皇上嗣位恩禮視宣德之  
初明年改元正統賜金幣加厚是年冬四川會川黎

漢蠻合底泊等爲亂奏遣弟都督昂討平之二年冬  
馬龍他郎甸蠻不靖復奏遣昂平之三年麓川思任  
發擾邊侵掠騰衝南甸遣人諭之不下奏躬率兵討  
之兵至潞江王勉諸將曰出兵尚謀不專恃勇且逼  
瘴月非用武之時今官軍已集如賊能畏威悔過摠  
誠謝罪請命赦之斯亦可也遂復遣人諭之不下乃  
命弟昂及都督方政等率兵前進王尤戒其慎重時  
王整兵在後政等夜渡江破賊柵賊衆奔北官軍乘  
勢追至景罕等寨斬首三千餘級家三十餘政奮勇  
獨進賊伏兵四發政力戰死之時春已半王慮瘴發

非官軍利遂旋師將駐金齒會有旨命王還鎮王至  
楚雄疾遂歿方疾革時顧弟昂曰吾父子兄弟受國  
家固極之恩吾不能報矣吾弟勉之吾一家子子孫  
孫世堅忠誠保臣節無忝君親又顧昂曰斯役也雖  
偏將失利固吾總帥之過此賊不可不貸汝勉之勉  
之言訖而逝歸櫬所過道路城郭無貴賤大小迓拜  
哀慟蓋王在鎮久惠愛之被於下者深也配程氏追  
封定遠王夫人子男一儼襲封黔國公

襲封黔國公謚榮康沐公斌神道碑

吳節

公諱斌字文輝初名儼字可觀世爲鳳陽定遠人祖  
考黔寧昭靖王諱英伯考西平惠良侯春考定遠忠  
敬王諱晟叔考定遠武襄伯諱昂歷世以勲閥總握  
兵符鎮守滇南公爲人謙恭純篤寬厚慈祥口讀論  
孟子史兵家韜略諸書手不釋卷侍人未嘗一毫驕  
矜形於言貌忠敬王鎮滇四十餘年公侍祖妣太夫  
人耿氏妣夫人程氏居金陵調適溫清曲盡孝道暨  
奉祭祀接賓客膝內治外咸合其宜人無間言正統  
戊午麓賊叛逆上命忠敬舉兵伐之明年己未班  
師遘疾薨於楚道公聞訃痛哭幾絕匍匐赴滇奉喪

歸并庚申春三月入覲詔襲公爵居京師侍從凡五年方忠敬之薨也 朝廷以西南夷僚素服沐氏恩信命公叔父武襄總兵往鎮乙丑武襄薨遂命公掛征南將軍印總兵兼撫其地 陛辭賜今名且勅之曰爾出勲閭夙諳禮教宜撫恤軍民宣布恩信懷服遠人務使盜息民安近悅遠服斯爾重託馳驛至滇適緬甸執麓賊思任發欲送京師復後其子思機發窺覘遂載公於是會同鎮守太監蕭保參贊侍郎楊寧參將冉保毛福壽提軍浩途接取公議宜先都指揮李昇進兵孟連以促之緬甸宜慰卜刺浪懼斬賊

首并妻孥來獻。上悅遣主事何瞻賜寶鈔彩段以  
勞其功。丁卯思儀發復。公為患。勅公同鎮守監  
丞郝寧都督方英叅贊侍郎。統軍往騰衝包砌  
城垣以撫以捕。時春氣瘴發。班師還鎮。戊辰。上慮  
賊子負固不廷。延蔓無辜。欲草並而。之命兵部  
尚書靖遠伯王驥平蠻將軍宮保總諸進兵討之。勅  
公往金齒騰衝南甸干岸等處操練土軍督運糧餉。  
遙振軍威。九月。公同侍郎焦宏自騰衝一路。列諸營  
堡。魚貫而進。直抵貫屯。金沙江轉輸接濟。大軍時王  
師深入。孟養思機發潛遁。公嚴督軍士固守橋梁。未



幾諸軍畢集攻毀寨柵禽賊黨班師而歸以公爲  
之後拒也次年己巳回鎮秋八月貴州苗民私結黨  
與攻圍城邑焚燒屯堡所過殘戮驛報相承公與藩  
臬重臣謀曰貴州乃吾滇南喉襟之地今若待命發  
兵邊境赤子恐無噍類矣迺遣委都指揮劉玉率輕  
騎倍日兼程往救之賊聞之勢遂披靡由是普定普  
安諸衛賴以安全未幾水西諸蠻攻圍畢節等衛告  
援甚急公遣人馳入賊所諭以禍福遂解圍而議  
者謂非公威信以攝之則迤西城守將不支矣景泰  
改元今上嗣登大寶遣行人黃裳奉勅褒嘉曰爾

祇事我國家清勤公正茂著才猷朕嘉念爾勞特賜  
銀幣其益效忠勤以副委任公承命奉職唯謹尋以  
疾薨年五十有四

黔國公贈特進光祿大夫右柱國太師謚武仁

沐琮墓誌銘

倪岳

弘治丙辰九月七日鎮守雲南總兵官征南將軍太  
子太傅黔國沐公以疾卒于鎮是夜有大星自東北  
墜于西光芒且天人皆見之殆非偶然也公無子既  
卒合鎮文武軍者之屬相向而哭者皆失聲已乃胥  
相告曰雲南非沐氏不能守遂合辭請以故右叅將

錦衣衛都指揮誠之子崑爲公後鎮巡重臣具以公  
訃及合羣情以聞 上震悼輟視朝一日贈特進光  
祿大夫右柱國太師賜諡武僖命禮部諭祭者十六  
東宮諸王皆賜以祭綸驛歸其喪工部營墳以葬復  
以雲南重鎮遂從所請命崑就鎮嗣封黔國公爵充  
總兵官佩征南將軍印繼守其地嗣公旣受命始獲  
遣官奉公之喪歸葬南京江寧之祖塋公諱琮字廷  
芳姓沐氏別號益菴又號東山居士其先鳳陽定遠  
人曾大父英間國輔運推誠宣力武臣特進榮祿大  
夫柱國西平侯追封黔寧王諡昭靖大父晟顯忠輔

運推誠宣力武臣特進榮祿大夫右柱國太傅追封  
定遠王謚忠敬父斌總兵官黔國公謚榮康母梅氏  
贈黔國太夫人公生之日百鳥翔集人以爲異未睟  
失怙從兄璘號繼軒有文武才由都指揮陞右都督  
充總兵官佩征南將軍印繼鎮雲南撫公友愛篤至  
四五歲時嘗抱置膝上教以詩書八成就學不數月  
卽能了涉孝經論語小學諸書大義善屬對應答如  
響未幾璘卒 朝廷以公尚幼復命璘弟瓚嗣兄職  
爲都督同知繼鎮雲南仍授公冠帶食祿之半以俟  
公日與縉紳士夫遊揖讓進退有老成風嗜學不怠

詞翰兼美人咸器之成化乙酉入朝嗣黔國爵憲  
廟寵眷有加丙戌春奉勅河南主行鄭靖王喪禮有  
白金文綺之賜丁亥三月命還鎮雲南如祖宗故事  
勅旨諄切錫賚優渥仍俾凡贊協同贊理公光毅有  
為不妄言笑勤於為政公退不入私室冠帶終日寒  
暑無間精究簿書事無壅滯凡白事者雖僕隸走卒  
亦引見於庭上下之情無復壅遏每遇修貢或拜進  
表文必焚香遣使不遑寧處 聖壽歲節行禮敬肅  
如在 上前朔望謁孔子廟退坐明倫堂使諸生執  
經進講誘掖獎勸無所不至作與學校完飭禮器給

學田展解額設宴禮以興起後進惠養鰥寡驅除貪  
暴物害既去人隱畢宣嘗奉勅督理軍儲留意屯田  
修治水利慎簡羣僚分任其事不數年間田無惰農  
庾有餘積矣或雨暘愆期有禱輒應民謳歌之農暇  
修邊壘飭驛傳因時訓練振揚威武道路險要之處  
增建哨堡置兵守之是以盜賊消弭疆圉晏然每邊  
夷執贄來見一無所受賞以酒肉幣帛諭以 朝廷  
恩威而遣之威德遠被諸夷敬服甲午安南國王遣  
陪臣何瑄至邊以假道爲名窺覘虛實公逆知其情  
拒不許詐不得蹀則侵老撾以啓釁公具以聞請

勅切責復命各夷酋長整搦軍馬慎固封守以防不虞交人知我有備不敢肆侮遣使詣闕謝罪云戊戌尋甸府土官知府安晟卒弟倘謀殺其子瑄欲爭襲兄職公遣官兵擒倘以聞明正典刑廣西府土官知府昂貴殘暴虐民抗拒官司其千百夫長龍判龍各逞夷情動輒讐殺委官審勘擒捕及昂貴歿遺子不許承襲二府皆奏請革去土官銓流官以治之開設學校教之禮義百姓安焉其馬隆慶江劍川順寧羅雄等處蠻夷弗率皆量遣官軍以次掃定既而臨安府石屏州昌明里強賊奔散聚衆搶虜附近村寨

勢漸猖獗命三司都指揮吳瑤等調漢土官軍及民  
兵往征之格殺番撒斬賊首級百餘殘孽潰散民免  
于擾巳亥鐵箐赤石崖等處羅羅尅習嘯聚山林流  
劫大理等府公奏調楚雄等府南漢土馬步官軍民  
兵命三司都指揮周佐等按以成算督率分守指揮  
馬鉉等分道進兵攻散其衆斬獲尅習俘男婦百餘  
賊平復請添設大羅衛兵川州以爲保障從之 朝  
廷嘉其功賜勅獎諭尋遣使賜以盞甲壬寅奉 勅  
偕都御史程公琮往撫孟密所過州縣秋毫無擾時  
有以平孟密方略獻者公斥之曰自征麓川以來軍



民凋弊極矣我寧被不善控禦之名不忍復事窮兵  
黷武之禍聞者避之癸卯橋甸賊首師五聚衆爲亂  
張旗幟稱總管剽剽鄉村焚毀解宇支解軍民敵殺  
官軍安寧鎮南廣通祿豐易門十數州縣咸被其害  
乃與鎮巡重臣合議命三司都指揮趙晟等調漢土  
官軍民兵分道進攻斬首千餘級俘男女數百人生  
禽師伍暨其妻孥境內始安具錄將校首功以聞  
朝廷特賜勅歷敘公在鎮功績加授太子太傅以嘉  
獎之乙巳南窩蒲賊莽丘負固距險搔擾永昌等處  
地方行旅不通民多殺傷復命晟等率兵以往且諭

之曰山路險阻難於攻圍宜以計取至則果如公命  
生擒莽丘及同惡渠魁以歸宥其脅從一境悉平弘  
治改元戊申 今上卽位之初念公久鎮外藩特遣  
使賜以白金文綺已酉賞平橋甸功將校陞秩有差  
復遣使賜公白金文綺公生動冒頓敏過人端勤有  
守苞苴不敢及門精究武經諸家兵法及陰符奇門  
諸書知用兵之要每命將出師算無遺策所向有功  
平居孳孳嗜學手不釋卷至於陰陽卜筮星命之術  
靡不究心善草書自成一家歌詩樂府富麗可觀性  
孝友自痛早孤事母竭盡子職及卒哀毀喪葬以禮

待庶幾咸有恩意御下寬而有制不事嚴刻雅量汪洋喜怒不形勢位已極戒滿思危兢兢業業未嘗有過衆方以遠大期之而遽止於斯惜哉其生爲景泰庚午閏正月十有三日春秋四十有七而已配王氏成山侯某女繼王氏金吾左衛指揮同知某女皆封黔國夫人

黔國公諡莊襄沐公崑墓誌銘 蔣 冕

自黔寧昭靖王以西平侯奉 高皇命統兵下雲南留鎮其地繼以王之伯子惠襄侯仲子定遠忠敬王及忠敬之子榮康公未幾而忠敬叔弟定邊伯武襄

之孫右都督東樓居士繼之既而東樓之弟都督同知吳榮康之子武倬又繼之以至於公首洪武癸酉訖正德乙卯公卒之年傳五世歷八人閱百四十年世篤忠貞敷宣德意綏輯民夷前後如一日忠敬在鎮餘四十年佐以武襄雖國封啓于忠敬而益固封守安內攘外則武襄之功尤不可泯者武襄諱昂公之高大父也曾大父諱錦衣備副千戶贈右都督大父諱瓚卽都督同知父諱誠錦衣衛都指揮使充右叅將嗣守金齒母徐氏生母李氏俱封夫人以成化壬寅某月日生公生甫九閱月而叅將沒大母賈

夫人育之弘治庚戌賈夫人沒公雖童孺已哀毀如  
老成人明年授錦衣衛指揮僉事以年纔十齡如例  
優給初武僖無子以公爲後丙辰武僖卒廷議謂公  
於武僖爲從孫止宜嗣昭靖初封侯爵事下雲南守  
臣覆議咸謂百餘年來雲南人習知黔國之稱一旦  
改公爲侯而稱西平恐人心驚疑或致生變 孝廟  
俞其議命公不必赴闕就彼嗣公爵勅佩征南將軍  
印鎮守雲南時弘治丁巳之十月己卯也踰旬仍特  
詔諭公親賢取善修德進學以不墜前烈公旣拜稽  
首受命旦夕惴惴思所以仰副聖訓以光世美者事

無大小必謀之察案訪之者舊務俾允合人情不違  
法制而後行之令嚴而不苛法簡而能信自食采外  
毫髮不取于人所部文武吏士蠻夷酋衆無不服其  
廉靜政務旣修乃簡閩士卒繕治城守汲汲以攘寇  
安民爲事庚申統兵勦龍山竹子箐及梁山等處  
蠻賊寇平而人不擾辛酉孟養侵孟境土檄三司撫  
諭之復其村寨十三處壬戌偕巡撫都御史應城陳  
公會貴州守臣合兵討普安賊婦米督及蠻賊福佑  
等首惡就戮餘黨悉平正德丁卯師宗州賊張受辛  
未安南長官司上舍那代相繼扇亂流劫隣近郡邑

公次第勦平先後事聞降勅褒諭者三加歲祿至百石者再賜白金文綺者五丙子加太子太傅丁丑以母夫人李氏愷將祔葬南京祖塋懇乞護送疏至三上 朝廷以公未可離任不允而優詔褒答特深委重焉己卯六月十八日以疾卒于正寢得年三十有八訃聞 天子嗟悼輟視朝一日命有司給棺斂賻米五十石布以匹計者如米之數贈特進光祿大夫右柱國太師賜諡莊襄公諱崑字元中姓沐氏別號玉岡自幼端慤凝重寡言笑喜愠不形於色說者謂其有忠敬風槩而學問之力尤有過人者天性明敏

好學不倦未弱冠於六經子史騷選與夫紀事纂言  
諸書多所記覽偶爾談及輒盛聲弗能休棚人廣坐  
中分韻賦詩伸紙立就酬答書疏會議政務皆出手  
筆公餘或憇棲鳳亭或登望宸樓招延賢士與之討  
論文義往往至夕忘倦先師大學士愛臺丘公嘗記  
武信忠愛之堂公讀而愛之手書數過刻置廳事日  
必三復焉先世述作文字亦多編錄刻梓以傳於世  
家人子弟山作其俊秀者習字學使之錄家乘及古  
今異書強壯有力者讀兵家書操演武事蓋恐其閒  
逸無所用心或博奕飲酒漸至驕情也公雖酷嗜文



墨未嘗玩物喪志冠帶終日勤於政理在鎮二十二年始終無少異

成國公贈東平王謚武烈朱公能神道碑

楊士奇

東平武烈王姓朱氏諱能字士弘世家鳳陽之懷遠  
父亮從太祖皇帝征伐有功累陞武毅將軍燕山  
中護衛副千戶謹持行善撫士有譽於時母某氏生  
王有令質自少喜讀書事父母至孝洪武甲戌襲父  
職事文皇帝於藩邸小心慎恭未嘗少懈而撫恤  
下人如其父甚爲上所信任旦夕侍不去側奉  
天皆難之師初興帷幄密議惟河間忠武王與王預  
焉時北平三司之交構造禍者王與忠武建議率庶

下首擒之遂奪城九門撫綏城內外三日人以大定  
引兵攻薊州擒其將都指揮馬宣等遂取遵化永平  
密雲從上攻深河旣還從克雄縣首破其東門敵  
衆敗走追及於月漾橋執其總師都督楊松潘忠等  
追其餘衆於漠州斬獲不可數計乘勝長驅入真  
定大敗長與侯耿秉文兵時王獨與敢死士三十餘  
騎追奔至滹沱河秉文衆尚數萬復列陣嚮王王奮  
勇大呼衝入敵陣敵衆披靡自相蹂躪死者無算棄  
甲來降者三千餘人上大悅賜書褒諭永平馳報  
江陰侯吳高以遼東兵攻城急王從上赴援高遁

走王追及之多所殺獲遂從定大寧戮其拒命撫輯其衆而還時曹國公李景隆率兵攻北平城王從上至鄭村埧與景隆兵遇大戰敗之進攻其營又敗之景隆兵列營九門者連敗之城中亦出兵夾擊景隆狼狽走王從攻廣昌蔚州大同次第悉下景隆復收潰散之卒號百萬來攻上親拒之王爲前鋒午至白溝河敗其都指揮平安軍及申又與敵兵戰大敗之明日王領左哨當前鋒又大敗敵兵盡克其砦柵敵走保濟南王率衆追之至鐮山敵嚴兵列陣以待王連破之敵衆釋兵降者萬餘人王以聞上悉

撫而從之蓋自是敵兵或德皆願來歸無復鬪志然  
上得之即遣之不留王從攻滄州先破其東門入  
城斬首六萬餘級敵震懼遂獲其總帥徐凱進攻東  
昌敵列陣決戰上以數千騎出陣後敵聞上數

匝王奮力翼上以出進戰夾河王爲奇兵先鋒大

敗敵將盛庸兵又敗平安兵于紫城追奔至真定戰  
其東門斬首萬餘級遂略彰德及定州勦西水寨已  
而敗敵將李文於德州遂克東阿東平破汶上諸寨  
設伏肥河敗平安兵十餘萬進戰小河爲敵所乘稍  
却諸將遠請旋師獨玉力勸上行曰用兵未必常勝

豈可因小挫輒自沮項羽百戰百勝竟亾漢高屢敗而終興自殿下舉兵來克捷多矣此小挫何足置意但當以宗社爲重整兵前進耳上撫掌嘆曰爾言深合吾心遂行至靈壁敵盛兵迎戰王先登陷陣大敗之生擒其副總兵陳暉平安參將馬溥徐真及都指揮三十餘人獲馬二萬敵衆死者屍蔽原野降者十萬人悉縱遣之進克泗州渡淮敗盛庸兵遂克盱眙下揚州從上渡江入京師內難平諸王臣民推戴上承大統論靖難功王居首賜號奉天靖難推誠宣力武臣特進榮祿大夫右柱國左軍都督府左

都督封成國公食祿三千五百石子孫世襲賜誥券  
追封三代考皆成國公妣皆成國夫人永樂二年命  
兼太子太傅四年安南黎季犛弑其國主毒虐下人  
拒遏詔使數諭弗悛遂發兵討罪命王總兵佩征夷  
大將軍印率左右副將軍左右叅將及神機橫海驃  
騎遊擊鷹揚五將軍兵八十萬討之臨行上親送  
之龍江師至廣西上顧侍臣曰朕夜察天象西師  
有憂其朱能乎然能足辦斯事朕第慮氣候非其所  
習耳踰旬訃聞上震悼輟視朝五日一時同王從  
舉義者永康侯徐忠等十數人皆入奉慰上灑泣

曰方艱難時協力一心相濟能其首也且其素存心  
行事皆應遠到曷遽止此言已益酸楚左右皆流泣  
莫敢仰視蓋王至龍州嬰疾薨十月初二日也春秋  
三十有七 上親爲文祭之宸衷悲愴溢於言表讀  
者皆爲泣下賻卹特厚追封東平郡王賜諡武烈并  
加贈其三代皆王爵 仁宗皇帝臨御時詔王配享  
太宗廟廷賜祭之文尤極褒重蓋當時元功之首也  
成國公贈平陰王諡武愍朱公勇神道碑

李賢

王姓朱諱勇字惟貞世家鳳陽之懷遠衛累業多著



今德祖諱亮當元末天下土崩乃從太祖高皇帝  
屢立戰功歷陞燕山中護衛千戶考諱能才略過人  
克承前業當太宗文皇帝靖難之初以心膂之寄  
獨克奮力所向必捷功居第一授封奉天靖難推誠  
宣力武臣特進榮祿大夫右柱國太傅成國公永樂  
四年安南爲亂命掛大將軍印率師往征之未至歿  
於軍追封東平王謚武烈賜以誥券逾年王襲公爵  
聞王自幼岐嶷不與凡伍出就外傳無統毅豪奢之  
習惟澹泊自處與韋布之士同讀書不事尋章摘句  
必求其要領於忠孝之大義利之微辨之弗明弗措

主師席者爲之擊節驗其所履殆無違焉爵旣在躬  
恭勤益倍無一毫驕態見於言面而敦厚簡靜之譽  
籍甚 文廟大異之日加眷注巡狩北京扈蹕往來  
歷掌帥府留守南京蓋老成可託故委以心腹也王  
握兵權號令不繁訓練有法不怒而威時 仁廟監  
國尤見禮重十八年命王隨侍北京二十二年從駕  
往征北虜有勞績及 仁廟繼承大統眷顧益隆左  
右股肱不二三人而賞賚優渥王獨加馬未幾 宣  
廟嗣位以王勳舊恩典頻繁白金文綺之賜極厚宣  
德初宗室有謀爲不軌者京師震動王密勸 上親

率六師以征之。遂用其計，兵出近郊，忽雷兩大作。王知吉兆，遂白於上曰：「天意有在，不戰而克。」遂計日兼行，師至，圍其城，彼方大驚，不意。上親征，而兵至之速也。卽日出降，罪人旣得，乃班師還京，而還贊之功，在王爲多。於是白金楮幣，人口之賚，特兼之焉。二年，隨上北征沙漠有功，加太子太保，特命總管大營兵權。王益殫心極慮，務精訓練，兵威大震。上深倚重，嘗御製重陽歌，揮宸翰賜之。五年，王以南北兩京及沿海陝西諸軍操備，潛運遠近相率，請以南軍潛運北軍操備，沿海陝西諸軍還營操守。上從之。

人以爲便自是每歲巡邊謁陵必命王綜理其務屢有金綺之賚六年冬至以京軍分調大同一帶防守者多進言恐非居重御輕之意上以爲然乃命兵部選精兵六十萬以益之七年上慮勲臣子孫過於優逸後不堪事于是屬王督練之而武藝遂精時萬全諸軍勞民供餉王進屯種之計以息轉運又言減放宣府調操者及留宣府諸軍備邊者悉准行之九年扈從巡邊慨然欲選將士抵其巢穴以勦絕之會胡虜自相讐殺阿魯台部落離散多相率來獻遂還十年正月今上皇帝嗣位之初王宿衛禁閑防

範嚴密介冑不除久之益重委託金綺幣楮之賜尤  
侈王愈感激竭誠輔導兼知經筵事每偕儒臣進講  
以成聖學王以爲天下雖安不可不戰復奏選銳兵  
四萬以備邊用正統改元之秋 上勅王曰勲臣子  
孫襲爵者操習之暇令讀書史講明理義以成其才  
爾其體朕至懷王於是親爲講解書史大義至於忠  
孝之道尤懇懇焉後各有成立之效四年加授特進  
榮祿大夫右柱國九年邊報有警王統兵出喜峰口  
敗虜寇於富峪川追及熱水川俘獲人口馬駝牛羊  
還以功進太保復賜蟒襲并介冑十四年虜寇犯邊

王復領兵隨駕往討之還至土木不意胡兵來襲進  
逼宣府上卽命王提兵西萬以禦之至雞鳴山會  
虜前鋒少却王促兵援之救傷甚重已而虜衆悉至  
王遂力戰以死是年八月十三日也距生洪武辛未  
七月二十二日壽五十有九天順改元 皇上復登  
大寶重念往者死事之臣賜王諡命追封平陰王諡  
武愍王配王氏都督官同之女閻範素閑克相其家  
封成國夫人子男二儀襲公爵信任指揮使女五

成國公贈太師謚莊簡朱儀神道碑

公姓朱氏諱儀字炎恒世爲鳳陽懷遠人祖諱亮元

木時從 太祖高皇帝起義兵累功授燕山中護衛  
正十戶祖諱能嗣職從 太宗文皇帝靖內難以元  
功封國公加授太傅追封東平王謚武烈配享太廟  
妣封東平王夫人曾祖祖考皆封王妣皆王夫人考  
諱勇嗣成國公爵歷事累朝皆總大兵掌中國中軍  
都督府事以功授太保正統末從 英宗睿皇帝北  
征歿于土木追封平陰王謚武愍妣沐氏繼妣王氏  
皆封夫人公王出也生而器宇凝重具文武材景泰  
壬申嗣成國公 景皇帝當祀太廟偶不豫夜宣旨  
遣公攝事倉卒無違禮丙子命治周世子喪財省事

集天順丁丑 英宗復位見公曰平陰有後矣 孝  
恭章皇后之合葬景陵讓皇后之改冊皆命公行禮  
有游幸或召以從壬午命持節封蜀王勞錫無所受  
嘗較射內苑連中的 上喜甚賜寶鑑一篋蓋自是  
始有意大用之癸酉南京守備官缺勅公往兼掌中  
軍都督府事賜白金三十兩金織蟒衣一襲甲申  
憲宗純皇帝嗣位申命以行時南畿飢命公賑救公  
議令獄囚贖米及都城商稅錢鈔皆市米諸藩給僧  
牒亦准是法所活甚衆時游食頗盛公議京伍未實  
宜使此輩應募爲兵得若干人鹽徒彭釗強賊李相



爲江路患。將校跡至九江。獲馬。儀真守備官缺。薦都指揮勝。勝舉以廉明官。至總漕都督。戊子。旱。奉勅會。讞獄囚多所矜釋。又議都郡歲輸軍儲。許臨船預放。三月。省耗數。船直得十餘萬石。貯於倉。倣古常平法行之。會有詔。諸守臣符驗皆進繳。公言。南京根本地。事有緩急。非符驗不能速達。又遣官勾稽營籍。公言。舊制軍數不宜泄。事皆寢。城門守兵盡肄營伍。止留老羸數人。公謂宜養銳示威。始定番代法。議久不決。後四年。公復力爭。又言。營卒多病死。請官置醫藥。行從之。今！皇帝之正儲位也。廷臣方表請公率南。

京諸大臣上表適至降詔優答且賜綵幣海賊劉通  
勢甚猖獗衆議欲招之公謂必先奪以威乃遣舟師  
分據要害賊勢窮歸罪械其首惡三十三人送京師  
脇從者皆釋弗治海道以寧乙巳星變求直言公所  
陳多切時弊屢上疏辭任詔以公廉靜老成不許加  
太子太傅視事如故 憲宗既升遐公哀慟極至燕  
不舉樂者三年 今上御極賜綵幣一襲白金二十  
五兩公復辭任亦不許有言武臣多不畏法請嚴降  
黜之令公言皆是祖父功所積且律有法豈宜槩黜  
遂報罷辛亥 皇太子生公首請正儲位受賜如前

物分  
運  
失人  
可  
女

孝陵明樓壞公請修葺之又言欽山十廟亦當修二  
後成有旨嘉勞刻石紀功大勝龍江二關及浦子口  
教場爲水所迫亟請內圖以免衝嚙避羅夷人入貢  
還泊龍江市中國子女爲奴婢事覺或言宜寘不治  
公以爲事關國體遂舉正管押通事官追給夷價各  
遣歸每歲錄囚公當執筆必從容訊問務求其情尤  
嚴祀事凡代事南壇太廟者各四社稷山川孝陵及  
大江之神各三以常典祭者多不可紀皆夙戒發未  
嘗少怠内外文武臣所與議事者前後四十人公處  
之皆寅恭協一久而彌篤當弘治丙辰三月六日卒

于正寢公始得疾卽上疏辭 上優詔勉留遣醫視  
疾命甫下而訃至矣 上震悼輟視朝一日賜誥贈  
特進光祿大夫右柱國太師謚莊簡公諱豐頰面  
如頰玉簡重寡言平生忠孝出于天性痛欲允難誓  
欲雪恥沙漠旣官于南不得遂志每燕坐愴恨灑淚  
我先王安在而我享此祿乎賜第中道石寢圯或請  
修之曰此石先王所履吾不忍易也事母夫人極能  
順志孝養居喪毀瘠去墓百餘里徒跣以行弔者雖  
微亦拜謝于門庶弟佶廕羽林前衛指揮使父沒財  
產聽其自取及佶卒撫其子輅亦厚都督僉事郭鉉

之母公女兒也嘗迎養于南僂送至殷勤馬遇烟黨  
皆恩義好拯人急嘗早朝道得遺楮追其子還之使  
歸至德州見鬻子女數輩盡收買之復遣其歸不取  
其直家人梁敏者廣東人娶婦生子矣其父見之徘徊  
不忍去公憐而遣之福英者鳳陽人爲盜所賣窮  
而歸公廉知其父止一子亦遣之有鬻子于舍官者  
官滿子戀母不肯行公贖歸之今裝爵千戶有父母  
道歿舟人棄其女於江涯公命有司收養後嫁百戶  
王隆爲命婦公好讀經史攻大小措法間吟咏聲伎  
狗馬一無所好臨財不妄取而贈施皆從厚故雖爵

上公歲祿恒不給禮賢下士至忌勢分汲引人物寸  
長片善必加甄錄武學官士躬自課試官將領登科  
第者相望尤識治體蒞政之初喜事者或有異議公  
謂留務至重不宜作聰明擅威福矣有更改守之不  
變久則民安而信之不疑矣守備三十餘年上下輯  
服軍民安堵外警不作古所謂無智名無勇功深長  
爲國之謀明哲保身之義兼盡而無遺矣顧事涉綱  
紀則力爭之爭之不得則嘆惋累日恒日事體易壞  
復之則難知者以爲名言配胡氏少傅忠安公之女  
封成國夫人賢而有則子長輔公教以忠義病革執

其手以指畫將士二字示之。今輔嗣公爵恭謹有父之風。

成國公贈太傅諡恭僖朱輔神道碑

徐階

公諱輔字廷瓚。東平武烈王之曾孫。平原武愍王之孫。守備南京。成國莊簡公之子。武烈以靖難元勳配享成祖廟庭。而武愍死土木之變。忠孝聞天下。至公思益光大先世之烈。遭世承平。無以自見。賜第有古槐一。時時挾書冊就其陰卧且讀焉。因自號枕槐。又數從姊丈李文正公學爲詩。長短篇什流傳縉紳。

樂  
一  
波  
酒

問而被服淡素言動恂恂如諸生諸縉紳相與稱曰  
儒者正德丙子秋虜寇白羊廷議遣將往禦公毅然  
請行既奉詔佩平胡將軍印充總兵官會虜退而止  
丁丑守備南京己卯逆濠犯安慶遠近震恐公與司  
馬白巖喬公畫策戰守以身任其安危賊覘知遁去  
遂以敗縛人于是知公古馮異祭遵之流亞也辛巳  
召還京嘉靖癸未予幸舉進士公實主宴恩榮拜禱  
之日予從兩同年修故事謁公私第公豫爲具以俟  
屬有風霾詔百司修省狀元姚君請公撤酒與樂公  
曰上未必知也姚君曰人臣之義固當不欺公奈



何以教後進耶曰吾姑試君君言誠是雖然吾願君他日無怠于茲言也遂進疏食見其二子麟鳳再拜以別今三十餘年予每念此不異前日事而公則已久不可作二子亦次第嗣爵卒矣予蒙恩入直無異間與公孫今太傅公追論疇昔爲之惻然太傅兄弟因屬予銘公神道之碑予不得辭太傅公名希忠以忠謹修雅爲上所眷倚其弟希孝爲右都督管錦衣衛事恭慎而甚文皆公次子嗣公鳳出

成國公追封定襄王謚恭靖朱希忠神道碑

張居正

今制異姓不王惟元功佐命有大勲勞于國者歿乃  
得追封焉 明興以來朱氏王者三人東平從 文  
皇帝靖難用決策力戰封平陰侯土木之難今定襄  
又以忠勞受知 三聖得賜封如其祖夫朱氏之先  
豈亦古神明之胄耶何其歷世久遠寢隆寢昌也初  
世宗肅皇帝南幸承天道衛輝行宮夜火侍衛倉  
卒不知駕所在獨王與陸都督炳翊 上以出世宗  
常言諸從我於難者功當與開靖等項余侍 今上  
於便殿會有司奏王卹典引令甲非軍功不王 上  
獨顧余言希忠昔事 皇祖有扈蹕功 皇祖遇之

甚厚朕今推皇祖意王之不爲踰制遂定封爲定襄王謚恭靖孝哉冲聖乃能追念先德不怠迨其所親信故臣也定襄王者諱希忠字貞卿其先鳳陽懷遠人七世祖亮從高皇帝起義以功授燕山中護衛正千戶六世祖肇封成國追封東平武烈王能五世祖平陰武愍王勇曾祖太師莊簡公儀祖十傳恭僖公輔父太傅榮康公鳳母成國夫人陳氏王生而警敏絕人稍長通尚書周易兼涉韜鈴有文武志略嘉靖丙申襲封成國公年甫二十一初拜表謝恩世宗望見王丰度秀整獨俾稅之自是遂被恩顧

承天府奉命告祭 顯陵戊戌上 皇天泰號充禱

策表進使禮成加太子太傅 世宗將有事 顯陵

召王與勳輔諸臣於慈寧宮幕次及文華殿南城議

南幸并冊立 東宮事日見親信己亥正月 世宗

御啓祥宮名諸大臣見 皇太子特命王扶掖 皇

太子以行因指示 皇太子曰此汝將來師保也二

月使持節冊封 穆宗爲裕王 聖駕南巡佩都護

副將軍印掌行在左府事至衛輝以身衛 上出於

火渡河侍御舟賜詩命和王操筆立成 上謂輔臣

曰勳裔中如此人才絕少稱善者久之是歲秋充神

機營總兵官庚子提督團營及五軍營王堅明約束  
撫循將士軍整以和壬寅夏掌右軍都督府事督營  
如故秋加太保丙午加特進榮祿大夫太傅庚戌加  
特進光祿大夫柱國九月虜穿塞直薄近郊王部署  
諸將卒晝夜捍禦虜知有備遁去解嚴加兼太子太  
師癸丑改掌後府事壬戌加太師王力辭不獲乃拜  
命 穆宗踐祚奉勅監修 世宗實錄知經筵事  
上眷倚方隆而王以疾不起時萬曆癸酉九月三十  
日也王歷事三朝中間代祀園丘三十有九方澤二  
十有九他中祀尤衆穆宗及 今上加冠俱王持節

掌冠進士恩榮宴者十九先後蒙被恩澤賜泛舟太液賜肩輿賜祕書賜禁中乘馬廐子錦衣者三歲加祿至七百石諸衣帶金幣器物人口之賚不可勝紀其卒也 上震悼爲之輟朝聘祭營葬皆視舊制有加至特賜追封王爵尤爲異數云王器宇凝重至性夙成始弱冠卽受知 世宗恩寵舉無與比然以是益斤斤勤恪每奉命攝祀必端肅熏沐致其精潔臨祭登降周旋咸中準度 世宗在位久以威嚴馭下雖素所親任輔舊往往被譴斥唯王以忠慎自結於上 世宗嘗稱之曰恪恭敬慎曰忠謹勤誠又曰卿

可謂爲臣允忠以故獨被隆眷三十年無絲髮不當  
上意指者逮事 穆宗及 今上以累朝勲碩百辟  
具瞻而小心翼翼始終一節進止殿陛皆有常度不  
失尺寸事父榮康公冠帶侍養立終日不歆仄母陳  
太夫人病亟王方直西內不敢言歸憂形於色 世  
宗見而異之以問輔臣具以實對乃諭令歸視母病  
無何陳夫人卒王哀毀骨立與其弟左都督掌錦衣  
衛事太保公希孝友愛篤至朝夕過從怡怡如也撫  
庶弟希慎無殊同胞與士大夫處貴而能降久而彌  
敬飲酒至數十斗雖大醉終不失一語練於國家典

故而口呐呐若無所知每廷議大事常遜居後不敢發端或稱引川言咸中肯綮世宗晚年諸大典禮卽輔臣有不及知者常命問王以王少在左右明習故事也然不問卽終不言其周慎如此余嘗以爲王兄弟孝謹如石慶石建而才略過之其重厚可屬大事如金日磾而文雅風儀日磾遠不及也桃李不言下自成蹊王生平篤厚謹飭未嘗自表異希稱譽而士大夫咸稱頌慕之唯天子以爲國器歿之日弔客皆爲掩涕嗟乎非其中心誠信乎於人烏能得此乎



英國公忠武張玉傳

朱睦㮮

張玉字世美祥符人也以元樞密知院來歸太祖禮遇甚厚玉感奮思效洪武二十一年從征卜漁海子哈喇哈之地以功授濟南衛副千戶又從征粉紅帖木兒至延安延州進安慶衛指揮僉事二十四年北虜侵軼邊境玉逐之至鴉寒山而還調燕山左護衛明年轉都指揮同知三十一年文皇舉靖難之師首用玉策收北平九門二日城內外悉定師將出上問玉何之對曰薊州要地不先平將爲後患薊平餘不足圖師至薊諭之不下玉環城而攻薊守馬

宣率衆出戰遂執宣殺之并執指揮毛某玉知其才  
釋之送詣北平是夜玉趨遵化簡勇敢士四鼓登陴  
開其城門將士皆入城中始覺守將率兵拒戰執其  
將斬之餘不殲一人將吏悉隨玉上謁而永平密雲  
皆望風輸欵謀報長興侯耿炳文率兵二十萬屯真  
定玉自請往悅還言軍無紀律不足慮也若逕趨彼  
雖衆新集我軍乘其未備一鼓可破也 上曰然明  
日遂抵真定接戰炳文大敗俘其左副將軍李堅右  
副將軍竇忠及都督顧成等斬首三萬餘級 上謂  
玉曰此行汝之功也非汝與吾意合不及此是時江

陰侯吳高以遼東兵攻永平城甚急而曹國公李景隆引兵數十萬將下北平 上與玉謀先援永平既至高望風棄輜重而去玉從 上追之俘獲甚衆玉因言大寧去此不遠請移軍襲之遂攻大寧自辰至午城破斬其都指揮朱鑑執都指揮房寬下令撫輯城中頃刻而定乃趨北平而景隆兵已圍城數日玉請先擊然後入援於是徑擣景隆營大戰三日城中亦鼓譟出內外夾攻景隆不支遁去復攻廣昌蔚州大同諸城皆下無何景隆收潰散卒號百萬且復至玉曰兵貴神速先事者勝請往駐白溝河以待後三

日景隆果至玉擊之斬敵無算景隆退保濟南玉乘  
勝追躡圍其城旣而解圍攻滄州獲其大將徐凱進  
攻東昌而東昌兵已列 上以數千騎繞其陣後忽  
被圍衝擊而出玉不知 上所在突入陣大戰連殺  
百數十人玉亦被創而沒時年五十有八 上聞哭  
之慟旣旋師諸將皆侍語及東昌事 上曰勝負兵  
家常事不足計所恨艱難之際失張玉良輔耳吾迄  
今寢不帖席食不下咽乃潸然淚下諸將皆感泣  
上旣踐祚顧侍臣曰張玉才備智勇論靖難功當第  
一惜其早沒贈奉天靖難推誠宣力武臣特進榮

大夫右柱國追封榮國公謚忠顯 昭皇嗣位加封  
河間王改謚忠武配享 文廟子三人長輔自有傳  
次輓天順初以翊戴功封文安侯卒子斌嗣坐祝詛  
國除輓與兄輓同日封太平侯卒子瑾嗣成化初以  
甯功國除

英國公贈定興王張輔傳

朱睦㮮

張輔字文弼河間忠武王冢子器宇雄壯顧盼有威  
弱冠從 文皇靖難以功封信安伯未幾進新城侯  
永樂三年交趾國王陳日焜爲其臣黎季犛所弑季  
犛詭姓名爲胡一元子蒼爲胡奩矯稱陳氏絕嗣奩

內閣全書 卷一百一十五

其甥請署國事 上不逆其詐從之未幾求襲王爵  
又許之踰年陳氏孫天平始從老撾潛至京奏愬季  
峯聞之懼上表請迎天平還以國四年春遣使者送  
天平歸至其境季峯伏兵殺之及其使者又僭稱尊  
號改國曰大虞紀年曰元聖時占城亦告季峯侵軼  
疆界強授以印服 上震怒乃議興兵討罪羣臣咸  
贊遂遣大臣告於郊廟分遣近侍徧告天下名山大  
川秋七月辛卯制諭成國公朱能佩征夷大將軍印  
充總兵官輔為右副將軍豐城侯李彬為左參將雲  
陽伯陳旭為右參將會同左副將軍鎮滇南西平侯

代大將軍

沐晟率師討之命兵部尚書劉儁贊軍事都指揮同知程寬指揮僉事朱貴等爲神機游擊橫海鷹揚驍騎等將軍刑部尚書黃福大理寺卿陳洽給事中馮貴督餽餉癸卯出師上親幸龍江誓於衆曰朕命汝等率師弔伐罪惟元兇曾從必釋尚懼朕心毋究武母殺降母繫累老稚母毀壞室墓母恣取貨財母掠人子女有一於此雖勞弗勸且底於罰能等受命以行九月壬申師次龍州大將軍遵疾以師授右副將軍十月戊子大將軍薨輔代總其衆以進遣使馳奏乙未輔率師發憑祥度坡壘關望祭境內山川告

以黎賊弒君害民內侵上侮之罪令都督同知韓觀於關下駐營督廣西軍運糧修道出游兵偵邏遣虜揚將軍呂毅等前哨至隘留關賊三萬餘人依山結砦掘濠塹率眾拒守毅等督軍進攻以盾翼蔽而上斬捕九十餘人賊散走大軍遂度關留兵守之輔以

檄黎  
氏二  
十罪

上意傳檄安南數黎氏父子之罪二十其略曰季彛兩弒其主以據國罪一也賊殺陳氏子孫殆盡罪二也不奉正朔僭改國名妄稱尊號罪三也視國人如讐淫刑暴斂筑獨罔依罪四也世本黎民背祖更姓罪五也既篡主竊位乃詐稱權署其事以罔朝



廷罪六也表請陳氏孫還以國及命使送之乃敢拒  
過罪七也誘殺主孫罪八也襲寧遠州七寨罪九也  
殺土官刁猛因虜其女盡徵其金罪十也威逼邊吏  
致其駭走罪十一也侵思明祿州西平永平之地罪  
十二也詐稱還地劫殺命使罪十三也占城國王古  
巴的刺新遭親喪舉兵攻奪其地罪十四也攻板達  
郎白黑等州掠其人民罪十五也勒取占城象百餘  
及沙離牙之地罪十六也占城爲中國蕃臣乃擅造  
金印冕服逼使其從罪十七也責占城國王惟知尊  
事中國凡兩加兵罪十八也朝使送占城陪臣還其

國以兵劫於毘陵港口罪十九也入貢不遣陪臣乃以罪人充使罪二十也交人讀檄莫不慟憤黎氏偕逆延頸以待王師庚子輔入雞翎關至芹站諜知片站兩旁有伏輔令呂毅等索之賊遁去是日遣鷹揚將軍方政游擊將軍王恕等抵富良江北嘉林縣哨探大軍由芹站西道至北江府新福縣聞左副將軍西平侯晟軍至白鶴遂遣驃騎將軍朱榮往會晟亦遣都指揮俞識來初大軍入境輔以上命戒部下秋毫無犯所至感悅至是三帶州僞僉判鄧原南策州人莫遂等來降言賊恃僞東西都及宣江洮江施

江富良江以爲固乃自三江府洩江南岬傘圓山循  
富良江南岬東下至寧江又於富良江北岸循海潮  
江希江麻牢江至盤灘困枚山緣江樹柵多邦隘增  
築土城城柵相連亘九百餘里盡發江北諸府州人  
二百餘萬守之驅老幼婦女以助聲勢又于富良江  
南岸緣江置椿盡取國中舟艦列於椿內諸江口又  
設捍木以防攻擊僞東都守備亦嚴陳列象陣于城  
柵內賊衆水陸號七百萬守險以老我師輔遂自新  
福縣移營于三帶州個招市江口造舟候進丁未

上聞能薨卽命補充總兵官且諭之曰昔我 皇考

命開平王常遇春爲大將軍岐陽王李文忠爲偏將  
軍率師北征而開平王卒于柳河川岐陽王率諸將  
掃蕩殘胡終建大勳著名青史爾宜取法前人殄滅  
逆寇以建萬世之功輔受命惟謹十一月辛卯驃騎  
將軍朱榮敗賊於嘉林江北先是輔等于上流濟師  
遣榮率馬步軍於下流十八里與賊對列且作舟筏  
欲濟之勢賊疑果分兵渡江劫我舟筏榮奮擊大破  
之丙申輔率大軍與西平侯晟合賊所立柵皆近江  
唯多邦城下沙灘平闊可止師然新築土城高峻賊  
於城下設重濠濠外坎地又置竹刺於坎內外其城

上守具嚴備賊兵往來如蟻輔乃下令軍中曰賊所恃者此城先登者受上賞軍士皆踊躍欲往是日輔等軍于沙灘議分兵輔攻城之西南晟攻城之東南部列已定別遣將士距欲襲之處里許設攻具出夜明火俾軍士執之約登城卽然吹銅角爲號夜四鼓輔遣都督僉事黃中等銜枚昇攻具迺重濠至西南城下以雲梯附城都指揮蔡福等先登以刀亂斫賊衆驚呼城上火然吹角應之士皆蟻附而上賊衆倉皇矢石不及發皆躍下城散走我軍遂入城賊將於城內列陣接戰驅象當前輔令游擊將軍朱廣等以

繪獅蒙馬分翅而前象皆股栗又爲銃箭所傷皆退  
走奔突賊衆潰亂我軍長驅而進殺賊帥梁民獻蔡  
伯樂追至會圓山賊自相蹂藉及被殺而死者不可  
勝計獲象十二器械無算癸卯輔令豐城侯彬雲陽  
伯旭率師攻賊僞西都賊聞多邗城陷焚西都宮室  
倉庫逃入海項之賊黨有以兵由生厥江潭舍江犯  
我軍者輔遣都督黃中等敗之於是三江路宣江洮  
江等州縣次第請軍門降五年正月丙辰輔調清遠  
伯王友晟調都指揮柳琮等合兵賊自注江濟師襲  
箬江柵破之又攻困枚山葛劫江晉賴山斬賊首三

萬七千三百九十餘級獲偽團副丁部曲殺之賊將  
胡杜復聚舟于盤灘江輔因南榮州土人隊正陳封  
來降即使擊之杜敗走閩海口盡得其舟仍使封招  
撫諒江東潮等處人民俾皆安業于是郡邑聞風相  
繼而降上書諭季粹罪逆者日以百計已巳輔得謀  
報賊舟往來於富良江距交州下流二十里又言季  
粹及其子潑屯於黃江遂率兵次木龙江屢及豐城  
侯彬率步騎戰艦由富良江進次魯江季粹以舟五  
百餘艘犯我軍輔等水陸夾擊賊舟膠淺遂破之賊  
偽將阮仁子阮磊阮劣獲舟百艘又擒其黨黃世綱

形文傑馮宗實莫鐵范鞋阮利等百餘人斬賊萬級溺死者甚衆三月辛巳輔遣都指揮柳升守賊子關毋何升報賊入富良江舟聯亘十餘里以勁卒數萬由陸來戰我軍旣至賊又用海舟橫截江中載木立柵以拒輔乘柵未備躬督將士力戰升等繼以舟師擊之賊大敗擒僞工部尚書阮希周斬僞羽衛將軍胡射等及將卒數萬人江水爲赤輔乘勝長驅至黃江抵閩海口季犛父子僅以數小舟乘夜遁去翌日僞吏部尚書范元覽大理卿阮飛卿千牛衛將陳日昭華領軍將黎威等詣皆降五月甲子輔追賊至典



與海門涇鵲淺久晴水涸賊棄舟走及我軍至大雨  
水漲數尺衆旣度大喜以爲似有神助輔率步騎至  
茶龍舟師亦至僞四輔大尹阮謹來降言李暉走又  
安遂遣升率舟師前進輔及晟循舉厥江進至日南  
州奇羅海口升破賊得舟三百餘艘輔等復引兵出  
奇羅海口以遏奔逸永定衛卒王柴胡等七人與賊  
遇賊困敗黨與皆散走柴胡等遂禽李暉及其子暉  
於海口山中乙丑獲僞大虞國王蒼蒼僞太子芮及  
僞梁國王澈僞柱國東山鄉侯胡杜凡黎氏親屬俘  
獲無遺南土遂平所得府州四十八縣一百八十五

評註  
交趾

三百十二萬象馬牛羊舟楫器械無筭遣升齋露布  
獻俘闕下詔下季犛等于獄而赦其子澄芮初輔受  
命時上令求陳氏之後立之至是戡定輔徧訪國中  
踰月諸郡邑官吏耆老等千一百二十人詣軍門言  
陳氏子孫向被季犛殲夷已盡無可承繼者安南本  
中國故地其後淪棄外夷化爲異類今幸掃除兇孽  
再覩衣冠願復立郡縣設官治理庶一洗夷俗永沾  
聖化輔卽疏聞上俞其請乃立交趾等處承宣布  
政使司都指揮使司按察司分其地爲十七府四十七  
州一百五十七縣據其地要害設衛十一守禦千

定和  
安南  
功制  
不安  
南歌

戶所三又於交廣分界設丘溫衛及坡壘隘留二守  
禦所軍隸廣西民隸交阯以相制馭又設水馬驛一  
十九自南寧府至龍州水道差遠增置驛舟并置遞  
運所以便朝貢皆輔條列 上悉從之六月以平安  
南復古郡縣大詔天下復勅有司爲陳王贈謚凡宗  
戚爲季弊所害者各贈以官又爲建祠樹碑葺墳墓  
禁樵採仍給戶三十守之六年春輔班師秋七月策  
功行賞進封輔英國公晟黔國公友清遠侯升安遠  
伯餘皆陞賞有差賜輔誥券玉帶金綺子孫世襲加  
祿三千石 上賜宴親製平安南歌以示褒異是年

再延  
交阻

冬李羣餘孽簡定作亂僭號大越改元興慶 上命  
黔國公晟往討久之無功廷議非輔不可七年二月  
復命輔充總兵官清遠侯友爲副總兵會晟勦之五  
月癸巳輔率兵抵仙游縣聞簡定等自相謀害阮帥  
等各懷疑貳推簡定爲僞上皇立陳季擴爲僞皇紀  
元重光竊據江河出沒爲患輔乃就叱覽山取材造  
舟招諭諒江北江等府避寇人民使皆復業六月戊  
辰師次慈廉縣賊率衆據喝門江粉社樹柵以拒輔  
攻破之進至威州孔目冊僞金吾將軍黃巨劍等聞  
之遁去諸州縣脇從者皆降竄伏山箐者皆歸復入

月辛丑輔遣都指揮同知徐政戍盤灘賊黨鄧景異等來攻政率兵出禦飛鎗洞貫其脇政猶督衆而戰賊敗去政腹潰而死己未景異等復據南策州盧渡江太平橋諸處輔出師向賊子關偽金吾將軍阮世美以衆二萬守之對峙立營柵列舟六百餘艘於江中又樹椿東南岸以爲扞禦時西北風急輔率雲陽伯旭都督朱廣都指揮俞讓方政等以划船戰船齊進火器迅烈矢發如雨禽偽監門衛將軍潘佺等二百餘人斬首無算九月庚午輔軍追捕至太平海口遙見賊舟三百餘艘泊海州南岸亟督都指揮方政

李龍等往擣之賊分舟迎敵我軍鼓譟而進賊艦夾  
戰賊大敗溺死者甚衆擒僞海寧衛大將軍范必果  
景異遁走十月辛丑季擴奏稱安南前王孫遣僞官  
段自始致書軍門求封爵輔曰陳氏子孫嘗徧求國  
中無有存者茲奉命討賊不知其他遂殺段自始麾  
兵前進遣都督朱榮蔡福以步騎先行輔率舟師繼  
之初賊于各處江海口多樹椿以土石實之舟楫不  
通至是輔由黃江阿江大安海口至福成江轉入神  
接海皆決其壅塞而行十餘日至清化水陸之師畢  
會而簡定已逃入濱州季擴往乂安阮帥胡具及景

異等皆散走於是輔畱清化取支黨盡殲之已而簡定至巨勒冊欲從地冊趨天關鎮聚衆拒敵晟率兵從磊江南趨巨勒冊都督朱榮都指揮羅文等以舟師從磊江趨牛鼻關輔率都督朱廣都指揮陳懷等以步騎從磊江趨地冊比至天關鎮簡定已從東黃冊趨多杯冊我軍追至美良縣簡定方寓民家見軍至卽棄馬及印帶等物走入山輔率兵四圍搜之十一月戊寅獲簡定并僞將相陳希葛阮汝厲阮宴等檻送京師伏誅是時賊黨阮師檜僞稱王與僞金吾上將軍杜原措等據東潮州安老縣及宜陽社有衆

三萬疋出黃江麻牢江大全等處海口劫掠八年正月輔以兵圍宜陽社師檜率衆拒不支斬賊首四千五百餘級擒偽監門衛將軍范支羽林衛將軍陳原卿鎮撫使阮人桂等二千餘人盡殲之斂其尸爲京觀焉二月召輔還以兵屬晟及雲陽伯旭勦滅餘寇未幾季擴聞輔還復與景異等嘯聚作亂九年春

三征  
交阻

上復命輔督師征之秋七月丙子師次常月江賊聞輔至樹椿江中四十餘丈江口兩岬皆置柵延亘二里許江內列舟三百餘艘設伏於山右景異及鄧容阮帥胡具等以衆來逆輔調都督同知朱廣都指



揮張勝俞廣領划船拔楫以進躬率都指揮方政等以步隊勦其伏兵至江岸季擴等敗走禽偽金吾將軍鄧宗穆寧衛將軍黎德彝武衛將軍阮忠威衛將軍阮軒等及其黨斬俘殆盡獲賊舟百二十餘艘十一月癸亥輔率舟師追捕季擴於綠海間石室福安諸州縣賊黨偽龍虎將軍大都督黎慈范慷等遁交趾城爲患斷銳江浮橋阻截生厭江交州後衛道路不通遂往征之慈慷等合五千人拒戰敗之慈中流矢死殺偽翊衛將軍大都督阮陀於陣禽偽衛將軍楊汝梅防禦使馮翕泉賊首千五百人以徇餘賊散

入林莽中而范憐杜個且鄧明阮思斌等相繼就獲  
十年八月癸丑輔駐舟師安謨海口遙見賊舟四百  
餘艘由大安入神投海遂率都指揮方政等往擊賊  
舟復出神投海分爲三隊銳甚輔督衆衝其中堅左  
右軍奮勇夾攻賊不能敵卽解纜走我軍追勦相與  
鉤連殊死戰自卯至巳賊大敗擒僞翊衛大將軍陳  
磊龍虎將軍鄧汝戲黎目金吾武衛威衛寧衛等將  
軍校尉安撫團練巡檢等使阮林等七十五人及其  
脅從千餘人阮帥等望風奔潰輔亟督軍出海追之  
不及而還磊等四十人被重創皆斬以狗汝戲等三

十五人檻送京師伏誅十月戊寅輔軍至土黃縣惡江搜捕偽少保潘季祐等賊衆聞之皆走匿季祐亦覓可雷山遣子僚請降遂給榜招之季祐父子與偽官吳噉等十七人詣降輔承制授季祐交趾按察司副使管又安府事招撫軍民已而偽將軍知府觀察安撫招討等使陳敏阮士勤陳全勗陳全敏陳立阮爽阮掩阮掉等悉降十一年冬輔展合兵至順州賊黨阮帥等屯愛子江設伏輔等列陣以進賊亦據險分三隊拒戰各列象於前輔策馬先薄左隊引弓射象象遽退走蹂賊陣陣亂指揮楊鴻等奮擊賊遂敗

都督同知朱廣等當賊右隊輔調指揮薛聚接戰賊益潰散斬偽少尉阮山擒偽將軍潘徑阮徐阮原熊黃原可及偽校尉阮度等五十六人并賊衆八百七十人追至愛子江得阮帥所遺偽入內檢校太傅并又安新平順化三鎮驃騎大將軍印賊黨既奔不復能聚鄧鎔弟偽鄉亭侯鄧鐵偽金吾衛將軍潘勤偽知州制巨徹等相繼出降偽大將何栗潘溪亦遣子來款十二年正月壬辰輔率兵至政和縣叱黃莊賊帥胡同降聞景異鎔領偽龍虎大將軍黎蟠等七百餘人逃進蠻昆蒲冊輔卽追至羅蒙江其地皆懸崖

側徑捫蘿可上遂舍騎而徒將士皆步從比至昆蒲  
冊景異等已遁又至此蒲捺冊賊及其土人皆遁不  
知所之遂大索夜行二十餘里聞更聲輔率都指揮  
方政等銜枚而往黎明至叱蒲幹冊江北賊據南岨  
立寨我軍渡江圍而攻之賊不能拒飛矢連中景異  
傷其脇遂禽鎔復遁政率軍追捕并其弟銳擒之盡  
獲賊徒黎蟾及景異等偽印景異創甚不能行遂剛  
之函其首傳送京師阮帥逃暹蠻輔遣都督朱廣率  
兵捕之廣往來暹人關諸山箐中悉獲鎔季擴家屬  
阮帥等逃依南靈州土官阮茶爨輔復遣指揮薛聚

率舟師奄至遂殺帥斬茶彙以徇聞季擴勢窮走老  
撾輔遣都指揮師祐率兵索之老撾懼請獲季擴以  
獻及輔遣檄往取不得仍令祐進克老撾三關至金  
陵酋賊黨散走棄季擴與其妻妾於及家冊南廢之  
地我軍悉生繫以歸季擴弟季摺稱僞相國驩國王  
先助亂于靖安州知季擴就縛乘舟走入海鎮夷衛  
指揮李鑑逐至多漁海口并其姊僞公主等悉擒檻  
送季擴及阮帥等至京師誅之三月庚子輔與晟議  
請建升華思義四州承制授降人阮堯揚夢松范公  
議阮險爲知州胡交張原注武征范昉爲同知仍以

書報占城王使知建置之故六月庚戌輔以四府與老撾占城暹蠻接境土官廣遠夷民繁夥宜有控制議請於各府置衛所繕土軍以土官指揮千戶理其事仍給印信從之九月戊申輔以交趾叛寇悉平委都指揮朱輝廖春率官軍五千留交趾備禦遂班師明年二月還賜輔白金三十斤寶劍二萬錠文綺五十襲四月上以交人新附命輔佩征夷將軍印充總兵官往鎮其地是時逆寇陳月湖糾合清化嘉江蠻作亂自稱月湖王及輔至交趾賊聞逃走追至赤土縣執月湖及其黨郭元慶等戮之自是交人皆帖

然服矣輔乃言自廣東欽州天涯驛經猫尾港至涌  
淪佛淘從萬寧縣抵交趾多由水道陸行止二百九  
十一里宜置水馬驛傳以便往來於是命防城等處  
設九水驛龍門等處設二馬驛寧越等處設七遞運  
所佛淘設巡檢同改交趾嘉林縣爲嘉林馬驛交州  
府瀘江欽州天涯俱爲水馬驛廣西橫州州門水驛  
隸南寧府皆如輔所請云十四年冬 上念輔久勞  
于外名還二十二年夏從 上北征七月庚寅至榆  
木川 上不豫明日大漸召輔受遺命凡軍務悉屬  
輔統之是年八月 昭皇卽位進輔太師掌中軍都



督府九月禮部尚書呂震言於上曰喪服已踰二

十七日請做漢制釋衰易吉大學士楊士奇謂震曰不可仁孝皇后崩文皇衰服後猶數月白衣冠

經帶矧上於皇考乃速卽吉乎尚書蹇義兼取二

說以聞詰旦上素冠麻衣經帶視朝惟輔與二三

學士如上所服朝退召士奇及蹇夏等諭曰昨震

請易服云皆與卿等議定然後奏時吾已疑其非及

聞士奇有言始知震妄因嘆曰張輔知禮六卿乃有

不及洪熙元年五月命輔監修文皇實錄八月復

命監修昭皇實錄書成俱有金綺之賜宣德初高

煦欲圖不軌遣素親信人枚青入約舊功臣爲應青  
至輔所輔卽繫其人以獻 上鞠之悉得其情頃之  
山東亦來告高煦反 上遂親督六師伐之命輔曰  
其一切機務卿其相朕輔對曰高煦徒懷覬覦然實  
怯懦無能爲也願假臣二萬卒當爲 陛下擒之  
上曰任卿一人足以破賊但朕新卽位小人尚有懷  
二心者亦當有以備服之及漢平大班褒賚三年冬  
十二月刑部奏決重囚命輔同都督尚書九卿都御  
史審覆論之曰古者斷獄必訊於三公九卿所以合  
至公重民命也已而輔奏枉者五十六人 上令法

司吏勘穉之四年二月 上用都御史顧佐言益加  
優禮乃諭輔曰卿以親以賢祗事 祖宗多歷年所  
忠存社稷功著國家逮朕繼承大統勤誠輔弼元勳  
厚德歸然於今方當注倚之時矧居災理之任不煩  
以政乃理攸宜可輟中都督府事官職俸祿悉如舊  
朝夕在朕左右相與究論軍國重務共保邦家卿其  
專精神明道德益弘啓沃之功用臻治平之效三月  
戊申加輔爲特進光祿大夫左柱國甲寅免其朝參  
但朔望入侍九月壬子賜宴 上親製詩贈之有輔  
弼寅亮之句歲時能賜甚蕃不可勝紀正統間屢知

經筵從容進退凜平儒者氣象又命監修 章皇寶  
錄成仍賜金幣鞍馬十四年秋扈從北伐歿於土木  
之難年七十有二追封定興王謚忠烈子懋嗣懋堯  
子欽嗣欽堯子崙嗣論曰予觀定興四履夷境殲厥  
渠魁復我中華數百年之故地易榛莽爲田疇變左  
衽爲冠冕而又建立郡縣分畫疆圻一統之盛古莫  
與比定興之功大矣哉往見大學士丘公濬著平交  
錄其敘功次訛舛且略予因備識於篇以竣史氏者  
采焉

鄂國公常遇春神道碑

宋 濂

洪武二年己酉秋七月七日銀青榮祿大夫上柱國中書平章軍國重事兼太子少保鄂國常公薨於軍中二十三日計聞 皇帝爲之震悼罷朝在廷之臣莫不灑泣越明日詔中書定議贈朔運推誠宣德靖遠功臣開府同儀三司上柱國太保中書右丞相追封開平王諡曰忠武八月朔日柩車至龍江 上往臨奠慟哭而還親爲擇地于鍾山草堂之原營建宅兆及樓靈之祠凡百須之具一給于官不以煩其家至冬十月九日始葬復推恩及其三代皆爲王爵生

榮灰哀可謂至矣。上猶念其功不置，召臣濂於庭而謂之曰：朕東撫高麗，西抵吐蕃，北際沙漠，南來交趾，占城莫不稽首奉命。計其開拓之功，以十分而言，王益居其七八。朕今手錄戰伐次第，以授爾，尚爲文勒諸豐碑，以著王之功於無窮焉。臣濂受詔而退，謹再拜序而銘諸幽。王諱遇春，姓常氏，濠州懷遠人。世爲農家，賦性剛毅，膂力絕人。歲壬辰，羣雄並起，江淮爲之鼎沸。時王年二十有三，爲羣盜劉聚所得，聚覩王狀貌奇偉，拔於行伍而信任之。王察聚所爲，終不能有成，欲擇所依，乙未間，上駐兵和州，領衆數十。

卷之五  
五

人棄聚來歸居兩月餘請爲前部先鋒 上曰爾之  
來者爲士卒糧絕故就食耳爾自有主我安得而雷  
之王請之再三至於涕泣 上曰爾姑從吾渡江埃  
克太平委身事吾未晚也夏六月 上先抵采石磯  
元兵陣於磯上而磯干巨舟如織相距僅三丈餘猝  
難登岸王乘快舸相繼而至 上麾之使前王卽捨  
舟挺戈先登衆皆披靡遂拔采石乘勝取太平從  
上守禦乃始投總管府先鋒冬十月陞管軍總管丙  
申春二月元中丞蠻子海牙復以兵屯采石南北不  
通 上慮將士雖渡江而其父母妻孥尚留淮西勢

莫可致命王統兵攻之王至設疑兵以分其勢而以正兵與之合及戰別出奇兵擣敗之悉俘其精銳自是元兵扼江之勢衰矣尋守溧陽攻建康功爲諸將先三月從今大將軍右丞相徐公達克鎮江夏四月授承信校尉領軍先鋒秋九月再攻常州會新軍叛去與僞吳張士誠合徐公被圍於牛塘王與諸將力戰大敗其衆擒士誠梟將張將軍冬十有一月除統軍大元帥丁酉春三月遂克常州遷中興大元帥夏四月從徐公下寧國秋八月克馬馱沙冬十月取池州戊戌春擢江南行中書省都督馬步水軍大元帥



冬十有二月 上親攻婺州己亥夏四月轉鎮國上  
將軍同僉書江南等處行樞密院事守婺城尋命攻  
衢州降之冬十月陞僉院十有二月攻杭州庚子夏  
五月召還京師從徐公拔安慶趙普勝之水寨時偽  
漢陳友諒揚言援安慶王策其必攻池州以羸弱守  
城伏銳士於九華山明日友諒兵果來攻城伏兵四  
合伴殺萬餘人六月友諒入太平犯龍灣王共謀擊  
敗之已而 上整舟師襲友諒留王守京師軍民無  
敢譁辛丑春三月拜江南行中書省叅知政事秋七  
月從 上取安慶破江州回守龍灣冬十有一月張

士誠出兵寇長興 上時駐九江聞報還京師命王  
往援士誠兵敗俘殺五千餘人壬寅春修安慶城羅  
友賢構亂據池州神山寨將與士誠通杭欵震動冬  
王往攻之癸卯春正月禽斬羅友賢餘黨悉平三月  
張士誠遣兵圍劉福通于安豐王從 上擊之將戰  
王突入其陣三戰三勝敵兵大敗已而俘獲士馬無  
筭遂同徐公圍廬州凡三月城將下適陳友諒攻南  
昌王解圍而還秋七月從 上率諸將往援八月遇  
友諒於彭蠡湖之康郎山王與之聯舟大戰呼聲動  
天地無不一當百縱火焚仍平章舟風急火熾十里

之間湖水盡赤敵將張定邊素號梟猛奮前迎敵王射之定邊中矢走友諒乃退保鞋山諸將以友諒兵尚強請縱其去王獨不言及我師出湖口皆言江流湍急欲放舟而下上知其情命以舟扼上流王應之諸將乃颺流而上舟蔽江面控湖口者旬有五日友諒軍食乏出江求戰王遣火舟火筏禦之敵兵奔潰追北數十里與之酣戰自辰至未未不解上所乘舟及王舟皆膠於沙王既脫御舟而已舟被圍復力戰于脫於是友諒中流矢死士卒十萬皆降未幾其臣立友諒之子理於武昌冬十月王帥師討之四面

合圍甲辰春二月理銜壁出降荆湖之地望風皆附  
陞中書平章政事秋七月從徐公取廬州八月遂自  
將兵平臨江之沙坑麻嶺十洞牛皮諸寨進取贛州  
乙巳春正月克之悉定南安南雄韶州夏五月還兵  
取安陸襄陽冬十月從徐公克秦州丙午春三月復  
從克高郵夏四月淮安濠泗徐宿安豐皆下秋八月  
諸將攻浙西師次太湖僞萬戶尹義等逆戰王擒之  
直趨湖州之毗山與敵兵水陸鏖戰敵兵大潰遂抵  
城下塞其四門晝夜環攻之僞丞相張士信悉發境  
中兵爲援屯于舊館出我師之背王統奇兵于大全

港入結營東阡復出敵背且填壑溝港絕其歸路士  
誠知事急出親兵拒關王一鼓勝之士誠復遣其將  
徐義統赤龍船親軍來援王復擊敗於烏鎮冬十月  
舊館降得兵六萬十有一月湖州亦下遂進圍平江  
丁未圍之益急士誠收合餘燼猶背城百戰降其將  
士且盡秋九月始克之縛士誠來獻籍其兵二十有  
五萬乃加授中書平章軍國重事疏封鄂國進爵上  
公冬十月復授征虜副將軍同徐公奉命北伐戊申  
春正月 上卽皇帝位國號大明改元洪武王與徐  
公下山東諸郡遂攻汴梁守臣李景道進攻河南

敵兵五萬屯於洛水之北將出迎戰王布陣既定單  
騎執弓矢衝入其隊敵發二十騎攢槩刺王王一箭  
中其前鋒大呼殺入悉獲其衆而河南諸城先後皆  
平 上幸汴京謀取燕都秋七月徐公與王渡大河  
河北諸郡又平八月二日燕都不戰而克元君北奔  
師次太原其守將廓廓帖木兒帥衆來禦其鋒銳甚  
王與徐公謀曰我騎兵雖集而步卒未至何以能戰  
莫若遣精騎夜劫其營其衆可亂衆亂主將可縛也  
徐公如王言廓廓帖木兒果中傷而逃已酉春正月  
進攻大同竹貞棄城走河東又平遂西入秦張良弼

遁李思齊迎降奉元鳳翔鞏昌臨洮又平夏五月元  
將也速兵侵通州有旨命王以所部軍東還拒之遂  
擒永平過惠州獲江文清士馬以千計至大寧也速  
遁破開平元君又北奔追至北河俘其宗王三人及  
平章鼎住等凡得軍士萬人車萬輛馬三千牛五萬  
全師還燕次柳河川得疾而薨享年僅四十爾王之  
爲人守謙而不矜有功而無過遲等決勝之方不學  
而能其從大將軍東征西伐而能遵守節制及其自  
將兵則所至無不克捷由其智識明而材力雄故施  
之各得其宜嗚呼若王者可謂開國之殊勲者矣復

推恩王其三代皆賜謚妻定遠藍氏封開平王夫人  
子男三人曰茂曰昇曰森皆 上所賜名女三人長  
許爲 皇太子妃

上所任將帥其最著者三人曰平章邵榮右丞徐達  
與遇春榮最爲宿舊且善戰旣貴而驕有所不得志  
輒謀伏兵置酒要 上飲而劫之事發就縛 上猶  
語諸將吾欲宥榮先以宥勞臣衆唯唯遇春直前曰  
人臣而以反名寧可宥臣誼不與之共生 上乃飲  
榮酒流涕而戮之以是心益愛重遇春

李氏續藏書

封鄂而謚忠武唐之尉遲氏宋之岳氏併開平而三



分州  
續集

論遇春功賜金幣一與大將軍等而封子茂鄭國公  
歲祿三千石予誥券配享 高帝廟廷與祠雞籠山  
功臣廟皆次大將軍爲第二遇春爲人沈警果毅撫  
士卒與同甘苦皆樂爲之用出則推鋒退則殿後未  
嘗敗北雖不習書史而用兵決勝與古人合年差長  
於大將軍二歲數從征伐未節制進止赴期不敢爽  
毫髮大將軍雅亦推愛之終始無小間惟性稍好殺  
而淫以此不能比大將軍而一時稱名將者猶曰徐  
常徐常云而 上亦均重之晚節每舉以勸諸將帥

必曰中山開平二王不偏廢也鄭國公茂者弱冠而封其婦父復爲宋國公馮勝以是益貴驕不練事上亦知之故不復使將封十七年而隸宋國公勝比北征納哈出茂念諸徹侯位其下皆得有偏裨任而已獨不得偏裨任邑邑不樂多不奉宋國公約束而宋國公兒子畜之數加責誚茂故慢辭以應宋國公恚而會納哈出請降詣右副將軍藍玉營讓酒與衣相忤納哈出悔欲出而茂直前搏之納哈出走茂復斫之傷而部卒頗有驚潰者宋國公得修恚上書增飾其狀以爲茂激變詔卽軍械繫至京而茂亦列上

宋國公貪淫不法事 上乃收宋國公大將軍印而  
削茂爵安置廣西然猶念邁春功別封次子昇爲開  
國公茂至流所而龍州守某土夷也慕茂家世以愛  
女事之而與他土夷爭爲所發茂聞之伏毒死或云  
龍州守隱之他所實不死 上爲窮索茂且發大兵  
繼之而卒不得茂踪跡或云定死矣乃小解而并嗣  
公之明年加太子太保建文末以抗靖難師得罪安  
置雲南之臨安以憂歿子繼祖繼祖子寧寧子復弘  
治中錄六王後得拜南京錦衣衛指揮使子紹襲紹  
卒子經襲經卒子鳳襲鳳卒子玄拔襲玄站中繼絕

世封懷遠侯號爲開國輔運推誠宣力武臣階特進  
榮祿大夫勳柱國歲祿千石卒子文濟嗣文濟卒子  
胤緒嗣

舟州籍稿開平世家

曹國公岐陽武靖王李文忠神道碑

董倫

洪武十有七年春三月開國輔運推誠宣力武臣特  
進榮祿大夫右柱國大都督府左都督曹國公同知  
軍國事李公薨於第 皇上輟視朝三日親製文遣  
使致祭追封岐陽王謚武靖賜葬地於鍾山之陰越  
三年秋有司奏王神道碑石已具而未有刻辭明日  
詔臣倫爲文撰次王之勲德以寵其子孫於無窮臣  
倫再拜稽首而退謹按王諱文忠字思本姓李氏世  
爲泗州盱眙人父隄西恭獻王尚曹國長公主生王

十有二歲而公主薨時元末大亂恭靖携王走軍中  
幾不能存聞 皇上駐兵滁陽始來見焉 皇上喜  
甚卽自養育擇師傅以教之一日取所業示近臣曰  
是亦可矣當於馬上習之歲丁酉乃以舍人領軍兼  
應池州僞漢陳友諒發兵寇城王奮擊敗之戊戌春  
正月進攻青陽石埭太平旌德皆下二月敗元判院  
阿魯灰於萬年街遂破苗獠于於潛昌化獲其婦女  
輜重甚衆王恐士卒恃此富驕莫有鬪志因激怒使  
其盡殺所獲焚其輜重曰此何足惜能努力破敵何  
患不富貴乎衆咸奮厲進次淳安夜襲破僞洪元帥

營降其衆千餘三月會寧河王鄧愈越國公胡大海  
兵取嚴州授帳前總制親兵都指揮使司左副都指  
揮兼領元帥府事守嚴州時嚴新破城壁未備而偽  
吳張士誠遣其徒率苗獠水陸奄至王與戰大敗其  
衆復取所斬俘馘載巨筏中乘流而下水寇見之亦  
避冬十有二月帥師攻諸暨克之壬寅春三月擢浙  
江等處行中書省左丞癸卯春二月苗獠蔣英構亂  
金華賊殺越國胡公王聞亂率兵馳赴賊委城遁去  
夏四月守將謝再興據諸暨以叛上命築新城於  
諸暨之西以拒之秋九月再興誘士誠寇東陽王自

兼以  
寡勝

嚴將銳師破之冬十月陞右丞乙巳春正月士誠遣  
僞司徒李伯昇大率其徒號二十萬寇新城王聞之  
卽合將士未至新城十里許有地曰龍潭立營其上  
新城守將遣人由間道詣王曰衆寡莫敵姑宜避之  
以俟大軍之至王曰以衆論之則我非彼敵以謀論  
之則彼非我敵且八千之謝玄破八十萬之苻堅庸  
非衆乎吾若未戰而退則彼勢益熾雖大軍至亦難  
爲攻矣莫若與戰死中求生正在今日何避之有遂  
下令曰彼衆而驕我少而銳以銳當驕可一戰而擒  
擒彼之後輜重皆汝等有也明日交戰王橫梁據鞍



引數十餘騎乘高馳下直出陣後衝其中堅敵列騎  
逆戰王格殺數人出入陣中所向披靡因督衆乘之  
敵遂大潰亂自相蹂躪城中將士亦鼓譟而出呼聲  
動地莫不一當百斬首數萬級擒將士七百餘人委  
棄鎧仗彌亘山丘自是張不能軍矣丙午八月名還  
京師陛受宸筭總水陸之師下江浙冬十月師進克  
桐廬新城富陽至餘杭謝再興子五人嬰城固守王  
合圍攻之一日而拔杭守將潘光明聞之恐遣員外  
方彝詣軍門請降王曰師來臨城而員外遠來得無  
以計緩我師乎彝曰大人奉命伐叛所過秋毫無犯

杭雖孤城生齒百萬擇所托而來尚有他意乎王見其誠引入卧内歡笑款接因命條畫入城次第翌日遣歸允明遂封府庫籍軍數出城拜降王入宿於城上令曰敢有擅入民居者斬有一卒下借民釜卽磔以徇由是內外帖然民皆不知有更革事就加榮祿大夫浙江等處行中書省平章政事戊申春正月上卽皇帝位國號大明改元洪武二月閩中旣平餘燼復合詔王討平之二年春以王爲偏將軍副開平王常遇春征進迤北由遵化度鹿兒嶺敗江文清於錦川次大寧元將十一鼓敗之追至深河斬

其宗王慶生遂進次大興王度其必走乃分兵千餘  
伏其歸路虜果夜遁遇伏大破之斬其將鼎住進克  
上都秋七月開平王苑於軍中八月詔王領其衆接  
援慶陽師至太原大將軍中山王徐達已討平之王  
聞大同受敵甚急因諭衆曰吾與若等受命而來闔  
外之事有利於國者專之可也若候進止吾恐大同  
之敵愈盛不可復制於是出鴈門次馬邑元邁騎數  
千猝至王與戰擒其將剗平章進次白陽門又擒點  
虜四大王前軍已去敵五十里爲營王至遂令遷之  
復前進五里阻水爲營是夜虜果悉銳來攻王堅壁

不動委二營以待敵督令死戰自寅至辰度其飢疲乃分兵爲左右翼出擊大破之乘勝逐北擒其將脫列伯降衆萬餘遂進兵至莽哥倉不見虜而還三年春正月授征虜左副將軍總兵北伐二月師出野狐嶺降其守將進師察罕腦兒擒其平章祝真夏五月克應昌獲元孫買的里八剌及后妃官女金寶玉冊以歸元太子僅脫身走追之不及而還過中興擒元將江唐國公進攻紅羅山其擁兵自固者皆請降冬十月朝廷論功行賞加開國輔運推誠宣力武臣特進榮祿大夫右柱國大都督府左都督曹國公同知

馬跑  
地得  
示

軍國事食祿三千石賜鐵券四年西蜀平詔王帥兵  
鎮撫五年春詔王同中山復征遼北王總兵東道五  
月取和林師進可溫至哈刺莽來虜連遁去王曰兵  
貴神速千里襲人難多重負乃留東平侯韓政駐輜  
重於廬車河令士卒各持二十日糧兼程並進至土  
刺河元將哈刺張蠻子悉起營渡河列騎以待王督  
軍力戰虜却追至騁海虜來益衆王據險爲營示以  
單弱虜疑有伏遡去軍還失故道乏水渴飲者甚衆  
患之至哥兒麻思出野尋水脉忽所乘馬以足跑  
地泉隨湧出三軍賴之乃刑牲以祭六年冬十月將

兵屯代縣出朔州擒元太尉伯顏不花七年春詔總  
兵北征王駐兵代縣遣將各出至三不刺者擒其平  
章陳安禮木屑飛至順寧陽門者斬其將珍珠驢至  
白登者俘其國公鄧孛羅帖木兒秋七月攻大寧高  
州大石崖克之斬其宗王朶朶失理擒承旨伯家而  
還自是邊境肅然矣十三年詔叅贊國事裨益恒多  
至十六年冬十有二月王有疾明年春疾轉亟東宮  
視明日 上親幸其第撫悼良久乃還王名諸子訓  
以大義翌日而薨時三月丙戌日也享年四十有六  
王器量沈宏人莫測其際臨陣蹈厲奮發至遇大敵

膽氣益壯故有不戰戰必勝及釋兵家居恂恂若儒  
生嘗師金華范祖幹胡翰講明性理之學其處身處  
家一循理度惟謹及出爲詩詞皆偉壯可觀至音樂  
華靡洎如也嗚呼王起貴戚際風雲之會東征西討  
挺立殊功名滿天下生有大國之對必有王爵之賜  
壽雖不及而耿耿者固將與國俱存久非可與身同  
泯也

二子景隆增枝景隆生而長身偉姿踈眉目頗矜矜  
如旣少奉文忠教齒諸生間與天台方孝孺善多習  
典故善談論每朝會進止雍容甚都 上亦目屬之

既襲爵與魏國公輝祖等分鎮中原要害地所使多稱進掌左軍都督府加太子太傅上崩皇太孫立景隆益以肺腑見親任而增枝亦屢遷至左都督進加景隆太子太師時兵部尚書齊泰太常卿黃子澄得幸上謀削弱諸王至燕而露燕兵起長興侯耿炳文武定侯郭英等攻之前後皆敗於是齊泰黃子澄皆才景隆而薦之乃命景隆爲征虜大將軍北伐用裴度故事賜通天犀帶人主爲推輪親送之江滸且令得以一切便宜誅賞時諸宿將多物故鮮存者而存者亦已老又皆景隆諸父行怏怏不肯爲之下



而景隆暴得意自尊大每升帳踞高坐毋敢與抗禮者皆唯唯不能片語而退景隆會兵五十萬於德州乘燕王之攻大寧遂進薄北平築壘九門爲長圍以困之王還師自救景隆逆戰大敗歿者十餘萬明日九門之師復潰歿者復數萬乃退走王復攻大同景隆引兵出紫荆關時寒甚士卒陷指者什二三乃移書燕王請罷兵辭驕蹇王亦貽書來報而心恨之甚遂戰于白溝河北凡三日而景隆復大敗殺溺及被俘者幾三十餘萬濟南遂見圍以叅政鐵鉉堅守不下始人主未知敗問與泰子澄謀以景隆懼尚爲輕

特賜黃鉞金鉦朱弓矢使者渡江而風失之復製以  
賜而景隆敗問至矣名還旣陛見黃子澄慚憤極執  
景隆於朝班慟哭請誅以謝天下人主莫能問也又  
二載師屢覆燕兵悉渡江駐龍潭人主懼乃使景隆  
同尚書茹瑺都督王佐來謁燕王以割地講和王笑  
曰事至此何地可割吾但欲得奸臣耳於是景隆等  
蒲伏密輸款歸佐谷王守金川門燕王至景隆等開  
門迎之 王卽位以景隆等默相事機改號曰奉天  
靖難階日光祿大夫勲曰左柱國增歲祿一千石其  
太子太師如故賞埒洪成二公改修 高廟實錄爲

監修總裁諸裁定功賞大興革景隆猶以班首主議  
天子雖外示崇重而心恨之益甚諸功臣咸扼腕謂  
彼白刃刺我而今以降虜而据我上其又明年刑部  
都察院大理寺臣論劾曹國公景隆包藏禍心蓄養  
亾命與其弟左都督增枝謀爲不軌已文武大臣太  
子太傅成國公朱能等吏部尚書蹇義等復言之已  
六科都給事中張信復言之乃下詔盡削景隆勲階  
官號絕朝請勒歸私第猶以長公主故不奪其爵亾  
何文臣羣臣復言詞事者至其家景隆猶坐嬖閹人  
伏謁如君臣禮大不道復株及左都督增枝因詔併

奪增枝荊州帥符逮之與景隆同繫私第盡沒其莊  
田寶貨圖籍赦獲入之官而所繫者皆親屬矣嘗絕  
其食旬日不死始稍稍給食至永樂末而景隆竟以  
凍餒卒正統中增枝猶在以恩例聽自便又數傳至  
其玄孫璿爲南京錦衣衛指揮卒子濂襲卒子性  
襲嘉靖中繼六王後封臨淮侯勲號階祿同僕遠戾  
卒無子叔父沂嗣卒子庭竹嗣數領管府漕事卒子  
言恭嗣好文學有岐陽王風委寄大約如庭竹

續稿岐陽世家

介州

衛國公贈寧河王諡武順鄧愈神道碑

朱夢炎

洪武十年冬十有一月初九日開國輔運推誠宣力  
武臣特進榮祿大夫右柱國衛國公鄧愈自河州名  
還至壽春以疾薨訃聞 上哭之哀爲輟朝三日詔  
追封寧河王諡武順其月十九日柩車至三山門車  
駕臨奠且親視其葬地而舊塋在鳳臺鄉者狄隘弗  
稱 上乃徧覽傍近岡阜擇於城南西山之原寬平  
爽塏勅有司營建墓兆仍命遷王母夫人及弟嘽之  
喪同葬焉凡喪事所需皆官給之恩至沃也 上猶

念其功不已名臣夢炎等於廷諭之曰愈事朕二十二年東征西討助勞至甚歷鎮八州有功無過爾其撰文刻之石以昭不朽臣謹按公牘所載賜名愈泗州虹縣人三世弗仕以王貴曾祖父大父贈資善大夫中書右丞追封臨淮伯曾祖母孟氏追封臨淮伯夫人祖父大公贈榮祿大夫中書平章政事柱國追封南陽侯祖母戚氏追封南陽侯夫人父諱順興贈特進榮祿大夫大都督府右都督右柱國追封衛國公母張氏追封衛國公夫人王生而魁偉幼有大志勇力過人元季壬辰天下雲擾王父衛國公起兵于

鄉遂戍臨濠與元兵戰歿之王兄友隆代領其衆未  
幾友隆病卒衆推王領軍事年方十六王出戰必挺  
身破敵軍中咸服其勇歲乙未上駐師滁陽王自  
盱眙率所部來附充管軍總管其年夏六月從渡大  
江克采石取太平繼而元將蠻子海牙以舟師扼采  
石陳也先合兵數萬逼城下上親督兵禦之調王  
與魏國公以奇兵出其後大破之生擒也先丙申三  
月定金陵拔深木破鎮江王皆與有功陞元帥出守  
廣德冬十有一月長給謝元帥率衆來寇王出城奮  
擊俘其總管武世榮及軍士一千餘人丁酉三月轉

行樞密院判移戎宣州七月領兵取休寧績溪乘勝克徽州元將敗走十月浙江苗楊元帥率衆十餘萬來攻城時徽州新附城郭未完守禦之器未備王激厲將士明立賞罰與越國公胡大海等分門并出奮兵力戰大敗其衆生擒部將胡辛等一百五十八人賊衆奔潰婺源元江同僉領兵來降戊戌正月擊破鐵木兒不花元帥寨斬首五百餘級追至婺源東門擒殺鐵木兒不花獲士卒三千餘人遂克婺源三月取嚴州四月攻淳安縣賊帥金子珍敗走獲馬一百餘疋降其頭目軍士三十餘人遷同僉樞密院事五



月浙江茜陽復率衆屯徽州烏龍嶺拒却之九月轉  
僉書行樞密院事己亥正月領兵略浙江臨安大敗  
張寇於閑林寨庚子七月鄱陽院判于光右丞余椿  
擊走僞漢部將辛問知取饒州遂以其城來附有旨  
命王往鎮之饒城彭蠡湖而僞漢王陳友諒尚據江  
州數遣州師來攻城王斂兵東門外與余椿于光等  
連營以拒之屢殲其衆賊兵進退辛丑正月除江南  
行省參政仍兼僉書行樞密院事總制各翼軍馬饒  
之境內弄兵者尚懷疑阻王推誠結納撫以恩信於  
是左丞吳宏等皆請降八月領兵襲浮梁僞參政侯

邦佐棄城遁八月取樂平擊敗蕭總管五千餘衆擒  
萬戶彭壽等六十八人饒境悉定進取江西十月駐  
兵於臨川之平塘時鄧克明據撫州遣使通款而實  
無獻城之志王知其情卷甲夜趨比旦入城克明單  
騎遁翌日遣人以分省印來獻王號令嚴肅秋毫無  
犯江右之民室家相慶爭持牛酒迎勞王悉却而不  
受是時上親討僞漢主陳友諒於江州友諒敗走  
遂下江西命王以步兵來會車駕至南昌有旨授王  
江西行省參知政事留鎮之時壬寅正月四日也癸  
卯夏四月陳友諒悉國內之兵圍江西江水暴漲寇

舟直抵城下王與諸將協謀固守屢挫其鋒賊勢大  
沮相持者凡三月會上親率援兵至湖口友諒懼  
而退大戰康郎山友諒竟歿甲辰三月新淦土豪鄧  
青叛以卒二萬人據永豐王調兵破之擒首賊劉理  
問劉右丞五十二人八月從開平王平臨江之沙杭  
麻嶺十洞諸山寨合兵圍贛州降之南安南雄韶州  
皆送款乙巳正月進江西右丞加湖廣行省平章出  
鎮襄陽西抵巴蜀北控河洛烽火相望新附之民未  
有定志王撫而鎮之民懷其惠軍忍其勞遐邇悅服  
吳元年十月擢拜御史大夫洪武元年命大將軍經

略中原而以王爲征戍將軍取江淮未附州郡三月  
攻唐州克之又取南陽生擒蔡國公史克新等二十  
七員軍士一千五百人馬一百五十疋七月剋隨州  
右丞王誠降九月進取洪山老馬劉寨夜四鼓斬關  
而入擒殺甚衆冬十有一月率兵討蜀河莽張獲之  
金商均房之境悉定三年命王爲征虜左副將軍平  
隴右大敗王保保于定西招諭河州土番諸酋元帥  
何瑣南普花兒只汪來等皆納印請降于是河州以  
西朶甘烏思臧等部來歸者甚衆冬十有一月定功  
行賞特封衛國公食祿三千石賜以鐵券五年命王

爲征南將軍討澧州等處溪洞蠻夷平之九年吐蕃所部州城邀阻烏思藏使者掠其輜重有旨命王爲征西將軍往討之十月王與副將分所將兵爲三併力齊入覆其巢穴窮追至崑崙山斬首不可勝計獲馬牛羊十餘萬 上嘉其功遣使召還未至蒙王以元後至元丁丑二月十五日生享年四十有一嘉靖中繼絕世續封爲定遠侯給誥券世襲

封爵考

信國公追謚襄武封東甌王湯和神道碑

方孝孺

洪武三十一年九月壬辰 皇帝御奉天門故東甌  
襄武王之孫昱頓首言曰先臣和沒已三年墓道之  
碑已具而未有刻文惟陛下憫之俾史臣有述馬制  
曰可臣昱至翰林以文爲請臣謹以其事聞有詔俾  
爲之銘臣乃言曰昔元德既衰天下大亂我 太祖  
高皇帝以神武明聖之資哀生民之無辜奮袂一麾  
四方響應及夷僭盜蕩滌兇姦十餘年間遂濟大業  
雖曰天命所歸不以智力然猛將名臣之勲著於王

室有可徵者昔王之歸鳳陽新第也 高皇帝有錢  
賜之勅其薨也有祭誅之文嘗自謂與王同受知滁  
陽王稱其智勇過人命勒石以紀勞績聖情深厚矣  
今陛下不遺舊而賜銘其碑以寵綏湯氏實行 高  
皇帝之遺志臣執筆從太史後何敢卒讓謹按故開  
國輔運推誠宣力武臣特進光祿大夫左都督左柱  
國議軍國事信國公追謚襄武封東甌王姓湯氏諱  
和字鼎臣世居鳳陽縣之東湖里曾祖五一府君祖  
六一府君皆以王貴追封信國公考七一府君贈特  
進光祿大夫右都督左柱國追封信國公曾祖妣某

氏祖妣周氏妣謝氏俱封信國夫人王幼喪二親卓  
越有奇志嬉戲常習騎射指使羣兒父老異之及長  
身長七尺側儻饒智略元至正間豪傑多起兵據郡  
縣王亦思自奮拔以取富貴壬辰歲間滁陽王據濠  
兵勢強率所厚壯士千餘人仗劍從之滁陽王奇王  
驍勇置之麾下使從諸將略地每在前行命爲百戶  
取九灣攻濠之定遠得兵千五百人推爲千戶時  
高皇帝處滁陽王甥館王委心推奉率兵從攻大洪  
山寨得兵八百陞長萬夫復從攻滁州殺其守帥以  
功多授管軍總管招集士卒益衆又明年甲午帝



自取和州諸將多滁陽王貴部曲顧望未盡效臣禮  
惟王以所領兵聽命甚謹帝心嘉馬會義兵元帥  
陳也先復攻和州王將士擊走之乙未六月帝渡  
江下采石定太平王獲敵馬三百士卒稱是旣而也  
先與其將康將軍水陸分道寇城王擊其水軍矢中  
左臂怒氣益奮中山王徐公達寧河王鄧公愈帥師  
由東門轉戰城北破其步軍遂生擒也先以獻王分  
兵取溧水句容克而守之丙申帝定建業三月王  
偕中山王取鎮江一日克其城兵不血刃陸統兵元  
帥復同中山王取金壇及富莊七月轉同僉樞密院

事丁酉三月克常州奉命鎮守其地攻取江陰明年  
僞吳張士誠兵寇常州王力戰却之擒其卒三百十  
月復來寇俘甲士千餘舟數千艘馬數十疋賊勢爲  
之少沮壬寅偕中山王攻無錫癸卯大破士誠兵於  
楊山斬其臬將獲甲首五百級逐其別將莫將軍虜  
其妻子以還拜中書左丞甲辰士誠弟僞丞相士信  
寇圍長興王率步將吳福典會開平王常公遇春軍  
合戰士信大敗而退超遷中書平章乙巳擊江西劇  
盜姚大膽斬之遂取永新州戮僞左丞周安等籍士  
馬歸於京師仍出守常州丙午帝命諸將代士誠

略太湖營於舊館降僞將呂左丞等虜其兵二千馬  
八十匹轉戰湖州守將張右丞降進擊吳江州將不  
能格亦降遂薄姑蘇圍之明年丁未爲吳元年九月  
中山開平與王益督兵力戰卒平姑蘇縛士誠以歸  
三吳悉定除御史大夫兼太子諭德階榮祿大夫時  
方谷珍據溫台慶元三郡與士誠比境聞士誠敗固  
已震恐王督諸軍攻之谷珍懼乘大舶逃匿海島中  
王遣人持書諭以國家威德谷珍卽率昆弟子姪待  
罪軍門得兵械舟楫以萬計所至不擾王之功居多  
乘勝下福州帝卽大位改元洪武王略定閩

中諸郡至延平主帥陳友定怙險橫甚令其副出城  
降觀望持兩端王虜之以歸東南海上晏然是歲九  
月 帝幸汴梁王實扈從既而與宋國公馮勝取懷  
慶澤潞絳二年同中山王拔河中渡河入潼關趨鳳  
翔越六盤關隴皆平明年與中山王宋國公至定西  
襲元將擴闊帖木兒營西北取寧夏至察罕腦兒獲  
其猛將虎陳定東勝人同宣府皆以勞先諸將九月  
還京師論功行賞賜以鐵券封中山侯號間國輔運  
宣力武臣階榮祿大夫勲柱國祿一千五百石明玉  
珍乘中國亂僭號四川以重慶爲都玉珍死其子昇

立四年詔王及德慶侯廖永忠統諸將征之昇鎖鑰塘峽以遏舟師王以計敗之水陸並進直搗僞都昇不能支率其臣屬奉金寶以降五年同中山王北征窮追和林明年覽通州外郭八年移鎮彰德覽其城是冬追元逋臣伯顏帖木兒于察罕腦兒獲馬牛羊無筭十年正月元日帝念王之功加號推誠位特進階爲光祿大夫職爲左都督勲爲左柱國爵爲公國爲信倂議軍國事加祿至三千石仍賜鐵劵王益恭畏不自驕盈繼與岐陽王李公文忠練卒於鳳陽鳳陽濠之賜名也明年巡撫西河州繕完其城郭營

舍十四年偕中山王北伐下灰山擒其平章別里哥  
及樞密副使久通又明年詔至四川永寧治塘濠飭  
士馬十八年五開山獠爲亂王帥師討之夷其窟穴  
俘戮四萬人及入朝王以春秋高思歸故鄉從容乞  
骸骨羣公次第以爲言帝喜之賜寶鈔五萬俾造  
第宅於鳳陽而謂王曰日本小夷屢擾東海上卿雖  
老強爲朕行視要害地築城增戍以固守備王行築  
海上數十城民四丁取其一爲兵以守之二十一年  
新第以成告率妻子陛辭賜白金以兩計者二千黃  
金以兩計者三百鈔以緡計者一萬五千文綺四十

端信國夫人胡氏亦賜金錢文綺甚厚俱降手勅褒嘉之二十三年元旦朝于京師忽被末疾且失音不能言 帝聞之大驚卽命駕臨視嘆惋久之遣歸故里十月詔王之子將命名至邸賜以安車入殿庭燕勞備至復厚賚卹歸以俟有瘳二十七年王疾彌甚不能興 帝思見之特詔輿入親手爲摩拊語及舊勞對之雪涕賜鈔六百五十緡預爲營葬之資二十八年八月七日薨於里第之正寢至是年七十矣訃聞 帝感悼爲之不御朝者三日追封定謚親爲文授使者以祭命親王成遣祭於其家棺槨明器冢曠

皆官爲之以是年十一月十二日葬于縣曹山之原  
詔肖像於功臣祠配享于太廟祥禫必賜祭 高皇  
帝禮遇功臣加恩于王恩禮之隆時莫與比夫人有  
婦德明詔稱其賢子五人曰鼎署前軍都督府僉事  
曰軌太原中護衛鎮撫曰鼎曰變皆早卒曰醴同知  
左軍都督府階榮祿大夫將兵征五開卒於軍女五  
人王沈毅質直勇而善斷不妄發言入聞國論一語  
不泄于左右行師受任有詔卽行不少顧家臨敵果  
敢堅忍未嘗挫衄有語及兵書者輒笑曰臨陣決機  
在智識敏達耳何以泥古爲家畜妾媵百餘暮年皆



資進寧家得賞賜多惠鄉黨父老及孤貧無告者貴  
極公宰及歸田里見故交遺民意驩如也厥後羣公  
多先物故而王獨享壽考以令名終斯固保身之有  
道而始終不倦可謂盛也已

嘉靖中繼絕世績封靈璧侯給誥券世襲

封爵考

附 湯胤勣傳

程敏政

湯胤勣字公讓濠梁人其曾祖佐 高廟取天下是  
爲東甌襄武王胤勣少負才好使氣貌類河朔人兩  
眸睜然髭奮起如戟年十五六入學爲生徒日記數  
萬言學有舊版文千餘字胤勣騎馬過一日成誦應

天尹下學傳籌名諸生胤勸獨後至當筓大呼折尹  
聲撼庭木尹愧憤卒筓之胤勸攘袂走出學門題詩  
府署合扉上有從今袖却經綸手且向江頭理釣絲  
之句遂去學出遊江湖上凡吳越間豪家富室爭延  
致之周文襄公轉運江南聞其名召之至曰王孫能  
作啓事否胤勸請紙筆卽席具狀幾萬言類宿構者  
皆切當世務文襄奇之上書薦其才有文武具驛  
召赴京時于少保方督諸軍請試之立胤勸將臺下  
萬卒環視于公摘古今將略及諸事舉以問胤勸應  
對如洪鐘不能屈左右嘖嘖嘆賞于公亦撫寧曰吾

子誠有才入對以爲錦衣衛百戶正統末 英廟北

狩 朝廷遣使通問已命中書舍人趙榮擇可副者

衆舉胤勛 詔以千戶如虜虜大酋脫脫不花問中

國事云何榮未及對胤勛前語之又時于坐上箕踞

岸幘朗誦其所著平胡論虜酋色變旣出謂中國譯

者曰彼髯何爲哉恨不殺之耳景泰中 詔舉將才

胡忠安公言胤勛才可用進署指揮僉事時典兵者

多忌胤勛不令治事胤勛亦時時嘆息其功名不偶

放浪詩酒間京師人率以爲狂所與游最善者侍講

徐有貞教授馮益太醫劉溥 英廟復位有貞入用

事然亦陰嫉其才不推薦之胤勣亦不登其門天順  
中校事者甚橫李文達公多裁之而文達嘗名胤勣  
與語胤勣張口論天下事及古今成敗一坐盡傾文  
達愛其才將薦之校事者遂摺拾胤勣往年在江南  
受昧事下之獄怒而辱之胤勣詬罵不絕口至詆之  
爲奴然胤勣寔出息于人而不立券無以自白遂謫  
爲民荷校出都城故人有唁之者胤勣仰天笑曰昔  
子以指揮爲足榮一湯胤勣邪掉首行弗顧成化初  
遇 需恩復其官再用言者言 詔以裨帥出守孤  
山堡孤山在延安西虜歲人之守者多以軍敗黜胤

勛得 詔曰噫吾歿矣夫孤山無城郭有他郡之來  
戍者七百人戰則爲備軍守則爲怯敵如此雖諸葛  
武侯復生亦難乎免矣抵鎮草封事數千言大率謂  
朝廷宜先戒孤山聚糧糗募歿士又侈書常路言  
狀遂憤憤吐殷血數升卧不能起丁亥虜入寇主將  
閉城門不出兵虜大掠子女而東胤勛怒髮上指曰  
歿國分也力疾而起戎服跨馬率麾下百餘人邀虜  
於境上力戰數十衆寡不敵遂歿山下是年八月也  
胤勛爲人軒豁倜儻直欲起古豪傑與之友視世之  
瑣瑣者以爲齷齪不足與語好以氣雄人不問名位

卑顯有不可意奮然去不顧或遂罵之至其人面赤  
不少貸甚有捶之者江陰知縣弗利于民將受代胤  
勛率少年數人直入縣廳反縛之狀共罪送之上官  
上官大駭并收下獄凡數歲會赦乃得釋夏郎中時  
正嘗于安上與之藏鉤不勝而怒語侵胤勛胤勛就  
坐上捽之下奉之蹴之衆客爲之股栗又嘗遇友人  
家見道士在坐與語不合而罵之道士不知其胤勛  
也稍稍有憾色胤勛捶之幾死與人言出入經史子  
籍縱橫閭閻隨意所如有問古名將者胤勛以張巡  
岳飛爲第一其人曰岳將軍則聞命矣張睢陽何如

人胤勅瞋目曰子不觀其對令狐潮之語乎卿未識  
人倫馬知天道自唐以下誰有爲此語者其所見如  
此詩豪邁奇崛如風雨晦冥中電光翕歘使人不敢  
正視又如雷斧斷崖石下墜不測之淵觀者褫魄每  
就人席上操觚立成數十章有名能詩者多爲其所  
懾或不能措一語以遜平生著述有五雲清唱風雅  
遺音東谷集千餘卷無子史官曰子少與胤勅游知  
其人使不歿爲大將將數萬兵出陰山其功名當不  
在古豪傑下顧獨膏血草莽中天也或者謂胤勅類  
太史公所謂遊俠乃大不然胤勅行事雖若任俠然

扣其所得朱家郭解直奴才耳烏足以比竄勸哉

焦太史編輯國朝獻徵錄卷之五終

獻徵錄

卷之五

百九